

Okushwekuurwa

# kw'Obusingye Mushanju bw'Ekanisa

Eshuura ya Mushanju

## Obusingye Bw'Ekanisa Ya Saadi

Okushuuruurwa 3:1-6

Handiikira maraika w'ekanisa y'omuri Saadi, oti: Ebi nibyo bigambo by'Ogwo Oine Emyoyo mushanju ya Ruhanga, kandi n'ezo nyonyoozi mushanju. Naagira ati: Nimmanya ebi okora; oine eiziina ry'okuba ohuriire, kwonka ori ofiire.

Sisiimuka, ogume nooreeba, ogumye ebikiriho ebiri haihi kufa; ahakuba Nshangire omuri byona ebi okora hatarimu kihikire omu maisho ga Ruhanga Wangye.

N'ahabw'ekyo oijukye ebi waahairwe kandi n'ebi waahuriire; obihamye, oyeteise. Ahabw'okuba ku oraabe otasisiimukire, okareeba, Ndyaija nk'omushuma; torimanya bunaku obu Ndikuhikiraho.

Kwonka oine amaziina makyе g'abantu b'omuri Saadi, abatarasiisire bijwaro byabo; abo baryagyenda Naanye bajwaire ebirikwera, ahakuba babishemereire.

Orikusingura aryajwekwa atyo ebijwaro birikwera, kandi Tindiiha iziina rye mu Kitabo ky'Amagara, kureka Ndyarihamya omu maisho ga Tata n'omu maisho ga baamaraika Be.

Oine amatu, ahurire eki Omwoyo arikugambira amakanisa.

### SAADI

Saadi rukaba ruri orurembo rukuru orwa Lydia eya ira. Rukaruga omu butegyeki bw'abagabe ba Lydia rwaza omu bw'Abapereesi kandi okuruga omwo rwaza omu bwa Alexandra Rugambwa. Rukanyagwa Antiochus Rugambwa. Abagabe ba Perugamo bwanyima baakuratiraho omu kutegyeka okuhitsya obu Abarooma baakwatsire obugabe. Omu bwire bwa Tiberio rukahindurwa amatongo ahabw'emitsitsa n'endwara ezirikurahuka kujanjaara kandi zikaita munonga omu kaanya kakyе. Eriizooba n'omutuumo gw'amatongo kandi tihatwiremu bantu.

Orurembo oru obwire bumwe rukaba ruri rukuru munonga omu by'obushuubuzi. Pliny akagamba ngu omwoga ogw'okuziga ebyoya by'entaama gukajumburirwa hanu. Rukaba ruri eibuganiro ry'okuziga ebyoya by'entaama n'okuruka zaakapeti. Rukaba rwine efeeza n'ezaaabu nyingi omu kicweka ekyo kandi nikigambwa ku esente z'ezaaabu zaabandize kuheesherwa okwo. Kandi rukaba rwine n'akatare k'abahuuku.

Ediini y'orurembo oru ekaba eri endamya etashemeire eya ruhangakazi Cybele. Omutuumo muhango gw'amatongo ga hekalu egyo nigubaasa kureebwa na hati.

Noija kwijuka ngu omu Busingye bwa Perugamo nkagamba ngu enteekateeka ya Babulooni eya “nyina n'omwana” erikumanywa nka Semiramis na Ninus ekahinduka Cybele na Deoius aba Asia. Ebikozire ababiri aba nibireeta amakuru maingi twaba nitubireeba kimwe aha rubaju rw'ekindi.

Omwana akaba ari ruhanga w'eizooba; nyina ari ruhangakazi w'okwezi.

Omwana akaba ari mukama w'eiguru; nyina ari omugabekazi w'eiguru.

Omwana akaba ari orikushuuruura oburungi n'amazima; nyina ari orikutwaza gye n'esaasi.

Omwana akaba ari omuteerani; nyina ari omukazi omuteerani.

Omwana akaba aine ekishumuruzo ekirikwigura kandi kikakinga amarembo g'ensi etarikureebwa; na nyina aine ekishumuruzo ekirikukishusha naakora nkawe.

Omwana ari omucwi w'emanja z'abafiire; nyina ari nk'omwemereire aha rubaju.

Omwana arikwitwa, akazooka kandi akatamba omu iguru; nyina naatwarwayo omutabani omu mubiri.

Hati omuri Rooma ruhanga ogu omwe ahairwe ekitiinisa kya Mukama waitu: naayetwa Omwana wa Ruhanga obwo omukazi naayetwa nyina wa Ruhanga.

Hati ekyo nikyo tushangire okwo enyima omu busingye buriya bubiri, ahu enteekateeka ya “nyina n'omwana” yaayeyongyeire kutwara omwanya muhango. Kwonka hati yetegyereze ngu nk'oku kyabaire kiri okwo enyima omuri Babulooni okuramya omwana kukatandika kuhwa amaani okuramya nyina kwayeyongyera, n'ahabw'ekyo, buzima nyina akatandika kutwara omwanya gw'omwana. Nitureeba omu busingye obu ku egyo ndamya y'ekipagaani eya Saadi yaabaire eri okuramya omukazi. Ni Cybele wenka, atari Cybele na Deoius. Nyina ogwo buzima atwairwa omwanya gw'Omwana, yaaheebwa ekitiinisa ky'Obwaruhanga. Eki omuntu arikwetenga

kukora kyonka n'okuraba omu maziina g'ebyeterero ga nyina agatari gamwe hamwe n'okwijuka ebitiinsa ebi Ekanisa ya Rooma erikuhama Mariamu kwetegyereza ahu ediini ey'obusingye obu yaarugire.

Ebintu bibiri bikankwataho munonga ku naacondoorize endamya egi eya Cybele. Kimwe kikaba kiri ngu akaba ajwaire ekishumuruza nka Janus ekyamuhaire obushoborozi oburikushushana n'obwa Janus, (ekishumuruza ky'eiguru n'ensi hamwe n'enaama) kandi n'eky'okugira ngu abarikuramya nibeeteera okuhitsya obu eshagama ejwa n'amaani erikuruga omu mibiri yaabo, ekintu ekirikukorwa Abakatoriki na hati abarikuteekateeka ngu nibabonabona nka Mukama.

Eky'okugira ngu obu nibwo busingye obwabandize buzima kwecwa ahabwa paapa bwa Rooma obwagyendeirwe gye, tihariho kubanganisa kikareetera Yezebeeli nabikazi kugumya n'okuhamisiriza enyegyesa ye y'okuramya Mariamu omu ncwamu y'okuhakanisa Abapurotesitante abaagizire ngu buzima Mariamu taine omwanya gwona omu puraani y'okujunwa kureka okugirirwa obuganzi ahari Ruhanga nk'omwishiki oshugaine odoorainwe kuzaara Omwereere. Luteeri ku yaayorekire kurungi enyegyesa y'okwihwaho orubanja habw'okwikiriza bakahamira aha mirimo, okweshasha, eshaara hamwe n'obundi buryo obutari bw'Ebyahandiikirwe. Kandi Abakristaayo abaabohorirwe ku baabaire nibaha ekitiinsa Omwana, Abakatoriki ba Rooma bakeeyongyera kuhindura Mariamu ruhanga kuhitsya obu ekyasha kya makumi abiri kyareebire (omu kuhakanisa kw'abarikukirayo obukuru abatendekirwe omu by'ediini ba Rooma) Paapa Pius naatunguura Mariamu butunu kumuhitsya aha kugira ngu akazooka n'omubiri gw'ekitiinsa. Enyegyesa egyo omu bwijwire n'eya Babulooni ey'omwana arikutwara nyina omu iguru omu mubiri.

Tiky'okutangaaza obusingye obu obwa kataano nibugyendera kimwe hamwe n'obusingye obundi kandi nibwija kugumizamu butyo okuhitsya obu burisherera omu nyanja y'omuriro ahu maraaya n'abaana be baryaitirwa omu kufa kwa kabiri. Reeba nkikyo, okuramya Mariamu, okuramya Cybele. Baitu, oramanyire ku Cybele yaabaire ari emandwa Astarte ei Yezebeeli yaabaire ari omunyamurwakazi waayo kandi akareetera Abaisraeli kuteera entsibo ahabw'emigyenzo y'obushambani ei Yezebeeli yaabaire ayebebera? Ego, ekyo niko yaabaire ari omuri Baiburi.

## OBUSINGYE

Obusingye bwa Saadi nari obusingye bwa kataano bw'ekanisa bukatandika omu mwaka gwa 1520 bwagarukira omu gwa 1750. Nibukira kwetwa Obusingye bw'Okuhunduza.

## ENTUMWA

Entumwa aha busingye obu niyo ntumwa erikukirayo kumanywa omu busingye obundi bwona. Akaba ari Martin Luteeri. Martin Luteeri akaba ari omwegi w'obwengye orikutwaza gye. Akaba naayega kuba omunyabiragiro obu oburwaire obwatwaire obwire buraingwa bwareeteire munywani we empika kufa kikatuma yaakwatwaho munonga aha mbeera y'amagara ge g'omwoyo. Akaza omuri Seminario ya Augustine ahari Erfurt omu mwaka gwa 1505. Okwo niyo yaayegyere filofose hamwe n'Ekigambo kya Ruhanga. Akatuura amagara g'okwebonabonesa kwingi munonga kwonka ebikorwa ebi byona eby'aharuguru tibirabaasize kumaraho okwehuriramu ekibi. Akagira ati, "Nkebonabonesa kuhika aha kufa kugira ngu ntungye obusingye na Ruhanga, kwonka nkaba ndi omu mwirima kandi tindabuboine." Omuhwezi mukuru w'ekibiina kye ky'ediini, Staupitz, akamuhwera kwetegyereza ku okujunwa kwe kurikuteekwa kuba obumanyi bw'omunda atari omugyenzo gw'ediini. N'okugarurwamu amaani oku, akeyongyera kusherura Ruhanga. Bwanyima yaaba omusaserdooti. Kwonka nabwo akaba atakajunirwe. Akahinduka omweziriki ohamiire omu kwegu Ekigambo kandi n'ow'amashomo g'ahaiguru omu by'ediini omu bwire bwe. Nk'omwegyesa kandi omubuurizi akaba asherurwa ahabw'okwetegyereza kwe okuhamire hamwe n'obwesigwa bwe bw'amaani. Kuhikiiriza okuhiga oku yaahigire akaza Rooma. Okwo akareeba okuburwa omugasho kw'emirimo ei ekanisa yaabaire egyema ngu neeza kureeta okujunwa, reero Ekigambo kya Ruhanga kyataahira kimwe omu mutima gwe ngu, "Ohikiire aryaba ohuriire ahabw'okwikiriza." Ku yaagarukire omu ka amazima aga g'engiri agahamiire ahari Baiburi g'Ekyahandiikirwe eki gakajurirana omu mutima gwe atyo yaabohoororwa yaaruga omu kibi yaazaarwa omu bukama bwa Ruhanga. Ahonaaho ahanyima y'eki akakuzibwa kuhika aha idaara rya Dokita omu by'Ediini kandi yaatumwa, "kumarira kimwe amagara ge omu kwegu n'okushoboorora omu bwesigwa kandi n'okurwanirira Ebyahandiikirwe ebirikwera." Eki akakikora, n'okukora nk'okwo okuhitsya obu omutima gwe hamwe n'emutima y'abo abaabaire bamwetooroire baraamatiire n'amaani aha mazima g'Ekigambo. Omu bwire bukwe Ekigambo kikahondana bwerure n'enkoresa mbi y'enyikiriza z'ekanisa hamwe n'enyegyesa.

N'ahabw'ekyo Leo X ku yaabaire paapa, kandi na Yohaana Tetzal akajja kuguza za indalugyensio ahabw'ekibi, Luteeri akaba ataine ekindi ky'okukora kureka okwimuka akahakanisa enyegyesa egi erikuhakanisa Ebyahandiikirwe. Eky'okubanza, akahindira aha kituuti naagirwanisa bwanyima yaahandiika enshonga ze 95 ezirikumanywa munonga ezi yaahanikire aha rwigi rw'Ekanisa ya Castle ebiro 31 Okwaikumi, omu mwaka gwa 1517.

Omu kaire kakye Bugirimaani ekaba yaakwatsirwe omuriro reero okuhunduza kwatandika. Hati ka kiijukwe ku Martin Luteeri atariwe wenka owaahakaniise Ekanisa Enkatorika eya Rooma. Akaba ari omwe omuri baingi. Abandi bakaba bangiire baapaapa obushoborozi bw'eby'omubiri n'eby'omwoyo obu (baapaapa) baabaire beehaire, kandi nangwa n'omuri baapaapa hakabamu empindahinduka nkye z'akaanya bwanya. Ego, hakaba

hariho n'abandi baingi abaimukize enshonga, kwonka aha kikwatiraine na Luteeri, obwire bwa Ruhanga bukaba buhikire ahabw'enkora yonyini eyaabaire neeza kuba entandikiro y'okugarura busya ekanisa kuhika aha kushukwaho kw'Omwoyo Orikwera omu bwire obwiriireyo omu maisho.

Hati Martin Luteeri, we wenka, akaba ari Omukristaayo orikukwatwaho oijwire Omwoyo. Hatariho kubanganisa akaba ari omushaija w'Ekigambo ahakuba akaba ataine rukundo nyingi y'okukyega kwonka kureka n'okukihitsya ahari boona kwenda ngu boona babe abahuriire ahabw'akyo. Akahindura Endagaano Ensyaya yaagiheereza abantu. Omurimo ogu ogurikurusya akagukora wenka, arikugorora ekicweka ky'ebi yaahandiika emirundi nka makumi abiri. Akashorooza ekibiina ky'abeegi Abaheburaayo yaabairiza haihi abaabaire barimu Abayudaaya reero baahindura Endagaano eya Ira.

Omurimo ogu omukuru munonga ogwa Luteeri nigwo murimo ogu emirimo yona eyaakuratsireho ey'Ebyahandiikirwe omuri Bugirimaani eyegamiireho.

Akaba ari omubuurizi w'amaani kandi omwegyesa w'Ekigambo, kandi akaba ahamisiriza okukira munonga omu myaka ye ey'okubanza obu yaarangaanwa omu bantu, ku Ekigambo kyabaire kiri engyenderwaho yonka. N'ahabw'ekyo akaba naahakanisa emirimo nk'oburyo bw'okujunwa n'okubatizibwa nk'oburyo bw'okuhindurwa busya. Akeegyesa Kristo ku niwe muteerani atari muntu kandi ku niyo yaabaire eri entwaza eyaabandize eya Pentekoote. Akaba ari omushaija orikushaba munonga kandi akaba ayegire ngu emirimo ei yaabaire ashemereire kukora ku yaabaire eyeyongyera, kandi n'obwire ku bwabaire bweyongyera kumubaho bukye munonga, nikwo yaabaire ayeyongyera kuha Ruhanga obwire bwe omu buryo bw'okushaba kwenda ngu ahamye ngu ebiraarugyemu nibiza kuba eby'omugasho. Akaba naamanya eki kyabaire kiri okurwana na sitaane kandi nikigambwa ku eizooba rimwe Sitaane yaamweyorekire butunu, reero Luteeri akamurekyera akacupa ka bwino, naamuragiira kugyenda. Obwire obundi abarikurengyesereza omu kwikiriza kwabo babiri bakamwijaho nibamusoonasoono okubeegaitaho omu kumariraho kimwe abasaserdooti boona hamwe na za Baiburi.

Akeetegyereza omwoyo ogwabaire gubarimu atyo yaababinga.

Kihandiikirwe ahari Dokita Martin Luteeri omu Byafaayo bya Sauer Ekitabo kya 3, orupapura rwa 406 ku yaabaire ari, “nabi, omubuurizi w'engiri, omugambi w'endimi, omuvunuuzi, byona omu muntu omwe, aine ebiconco byona mwenda eby'Omwoyo.”

Ekyasisiimwire omutima gwe ahabw'Omwoyo Orikwera, kandi ekyabaire kiri akamera kakye ka kinyaatsi akaabaire nikooreka ku amazima gaabaire nigagaruka omu kanisa nk'oku gaabaire nigamanywa ahari Pentekoote, ekaba eri enyegyesa y'okwihwaho orubanja: okujunwa ahabw'embabazi, etari mirimo. Niinyetegyereza ngu Dokita Luteeri tarakiriire kwonka, kandi akabuurira kwonka, okwihwaho orubanja, kureka egyo niyo yaabaire eri enyegyesa ye nkuru nk'oku omu mazima kyabaire kishemereire kuba ahabw'okuba egyo niyo enyegyesa ey'okubandizaho ey'amazima g'Ekigambo. Aryaguma naamanywa ebiro n'ebiro nk'ekikoreso omu mukono gwa Ruhanga owaagarwiremumu amaani amazima aga. Akaba ari entumwa ya kataano kandi obutumwa bwe bukaba buri, “OHIKIRIIRE ARYABA OHURIIRE AHABW'OKWIKIRIZA.” Omu mazima nitwikiriza ngu akaba naamanya kandi akeegyesa ngu tushemereire kuruga omu kwikiriza turikuza omu kwikiriza. Okwetegyereza kwe okurikutangaaza kw'obukuru bw'okwemariirira kwa Ruhanga, okutooranwa, okumanywa ira hamwe n'agandi mazima nikumworeka kuba omushaija rugambwa omu Kigambo, kwonka nabwo ningaruka ngamba, nk'oku ab'ebyaafaayo bagamba ngu, Ruhanga akamukoresa kureetera abantu orurengo rwa Ruhanga orurikuhakanisa emirimo - “Ohikiriire aryaba ohuriire abahw'okwikiriza.”

Hati nk'oku mbaire naagambire, obusingye obu ab'ebyaafaayo bakabweta, Obwire bw'Okuhunduuza. Ekyo, kihikire buzima. Ekyo nikyo bwabaire buri. Nikwo bwabaire nibuteekwa kuba ahabw'okuba Martin Luteeri akaba ari omuhunduuzi, atari nabi. Hati nimmanya ngu ekitabo ky'ebyaafaayo kimweta nabi, kwonka ekyo tikirikumanyisa ngu ekitabo ky'ebyaafaayo kihikire, ahabw'okuba tihariho ekirikumanywa ahari Martin Luteeri okumubaasisa kuba nabi w'amazima wa Ruhanga omu buryo bukuru bw'Ebyahandiikirwe bw'ekyo kigambo. Akaba ari omwegyesa murungi kandi omu magara ge Omwoyo akeeyorekyeramu kandi nitusiima Ruhanga ahabw'ekyo. N'ahabw'ekyo tarabaasize kwebembera ekanisa kugigarura aha mazima goona nk'omushaija Paulo entumwa owaabaire ari byombi entumwa kandi nabi.

Hati obwire ku bwagumiizemu nitureeba empinduka mpango omu buryo obu yaabaire atwazamu enshonga ezi yaabaire aba arimu. Okubanza akaba ari omutwaza mpora, otarikutiinisibwa, orikugumisiriza kandi buri kaire arikutegyereza Ruhanga kumaraho emirabanamu. Kwonka bwanyima omubaro muhango gw'abantu gukatandika kwija ahansi y'ebendera ye. Ekigyendererwa kyabo buzima kikaba kitari ky'omwoyo. Kureka kikaba kiri eky'eb'obutegyeki. Bakaba nibenda kuhenda omugamba gwa paapa. Bakaba batakunda kwoheereza empiiha Rooma. Abarikurengyesereza omu kwikiriza kwabo bakaimuka. Omu bwire bukye baamutaasya omu nshonga z'eb'obutegyeki hamwe n'encwamu omu mazima ezaabaire ziri aheeru y'entwaza y'ekandisa kureka ngu ekanisa okurabira omu kushaba, okubuurira hamwe n'engyesho eshemereire kutaho engyenderwaho y'okukuratirwa. Emirabanamu egi y'okwetaasya omu by'obutegyeki ekeeyongyera okuhitsya obu yaagyemirwe omurimo gw'akaanya bwanya ogw'okuba omuteerani w'abakungu n'abahingi abashembereire aha itaka ry'abandi. Encwamu ye ekaba egwire

unonga okuhitsya obu akaimukiriro kaabaireho kandi abantu enkumi n'enkumi bakaitwa. Akaba aine

ekigyendererwa kirungi, kwonka ku yaajejwangire omu Ngiri y'Ekanisa na Gavumenti akaba naateekwa kushaarura akasooroora.

Okwihaho ebyo, Ruhanga akakoresa Martin Luteeri. Reka kirekye kugambwa ngu ebigyendererwa bye bikaba bigwire. Reka kigambwe ngu okucwamu kwe kwonka nikwo kwabaire kutahikire. Omu mazima aba Luteeri kuri nibagaruka aha nyegyesa ye kandi bakahereza Ruhanga nk'oku ow'eishe-emwe ogu omunyambabazi yaamuheereze, obwo abantu abo omu mazima bakaaba ab'omugasho kandi eky'okuhimbisa ahari Ruhanga mukuru kandi omujuni, Yesu Kristo.

### OKURAMUTSYA

Okushuuruurwa 3:1, “Ebi nibyo bigambo by'Ogwo Oine Emyoyo mushanju ya Ruhanga, kandi n'ezo nyonyoozi mushanju.”

Ogundi murundi nk'omu busingye buna obw'enyima Omwoyo naatushuuruurira Mukama waitu omunyambabazi naayoreka ebimurimu ebirikutangaaza. Obwire obu nk'oku Ayemereire ahagati y'ekanisa, nitumureeba nk'Ogwo oine Emyoyo mushanju ya Ruhanga hamwe n'enyonyoozi mushanju. Nitumanya eki enyonyoozi mushanju ziri, kwonka nitwija kusherura eki Emyoyo mushanju erikumanyisa.

Ebigambo bimwe ebi nibishangwa omu kitabo ky'Okushuuruurwa emirundi ena. Okushuuruurwa 1:4, “Ebirikuruga aha Myoyo mushanju Eri omu maisho g'ekitebe Kye eky'obukama.” Okushuuruurwa 3:1, “Ebi nibyo bigambo by'Ogwo Oine Emyoyo mushanju.” Okushuuruurwa 4:5, “Ahansi y'ekyo kitebe ky'obukama haarugaho emirabyo n'amaraka n'okuhinda kw'enkuba; kandi omu maisho gaakyo haayakamu amatabaaza g'omuriro mushanju, niyo Myoyo mushanju eya Ruhanga.” Okushuuruurwa 5:6, “Kandi ahagati y'ekitebe ky'obukama n'ebhangirwe ebyo ebiine amagara ebina n'abo bakuru, naarebaho Omwana gw'Entaama ayemereire, naashusha Owaisirwe, aine amahembe mushanju n'amaisho mushanju, niyo Myoyo mushanju ya Ruhanga etumwa omu nsi zoon.”

Eky'okubanza, nitumanyira kimwe ku emishororongo egi etarikwegyesa enyegyesa nsya erikuhakanisa Yohaana 4:24a “Ruhanga n'Omwoyo (omwe).” Kwonka eki nikishushana na 1 Abakorinso 12:8-11 ahu turikushanga Omwoyo OMWE Arikweyorekyera omu miringo MWENDA. N'ahabw'ekyo nitumanya ngu Emyoyo mushanju ya Ruhanga neamanyisa ku n'Omwoyo ogwo omwe orikwizira omu miringo mushanju. Hati omu Kushuuruurwa 4:5 Emyoyo egi mushanju niyo emwe neeyetwa “etabaaza z'omuriro ezirikwaka” omu maisho ga Mukama. Obu Yohaana yaabaire atakoresa kandi kureka ebirikushushanisa eby'Endagaano eya Ira omu kitabo ky'Okushuuruurwa ku turikuza omu Ndagaano eya Ira nitushanga omu kitabo ky'Enfumu 20:27 ngu “omwoyo gw'omuntu n'etabaaza ya Mukama.” Egi Myoyo mushanju neeshangwa eine akakwate n'omuntu. Yohaana Omubatizi omuri Yohaana 5:35 akeetwa “etabaaza erikwaka” kishemereire omu mazima kuhindurwa “nk'etaara erikwaka.” Nabwo omu Okushuuruurwa 5:6 Emyoyo mushanju neeyorekwa nk'amaisho mushanju. Omuri Zekaria 4:10, “Mbweni n'oha oragayire ebintu nibikitandika? Baryashemererwa, baareeba kariisho omu ngaro za Zerubabeeli. Ago matabaaza (mushanju) nigo maisho ga Mukama.” Nikyeyoreka buzima ku ekigambo “ago” nikimanyisa abashaija. Omu muringo ogu nitureeba ngu amaisho ga Mukama omuri eki n'abashaija - kandi buzima nibaija kuba abashaija abashukirweho amajuta, baijwire Omwoyo Orikwera, ahakuba obuheereza bwa Ruhanga tiburi omu maani g'abantu kureka omu maani g'Omwoyo Orikwera. Twata hamwe ebi twajumbura eby'Ebyahandiikirwe nikyeyoreka ku Emyoyo mushanju ya Ruhanga erikugamba aha buheereza oburikugumizamu bw'Omwoyo Orikwera omwe ogwo omu magara g'abashaija mushanju abu Ruhanga arikuhika haihi munonga omu kubeeyorekyeramu. Nibo maisho Ge, kandi nibo matabaaza Ge. Abashaija mushanju aba eki bari nikibaasa kurahuka kureebwa ahabw'okuba ebigambo ebyakurataho nibibeeta enyonyoozi mushanju ezi twamanyire nk'entumwa mushanju aha busingye mushanju. Ekyo ka ni kirungi. Waareeba, enyonyoozi ekaba eshemereire kugarura omushana ny'ekiro, ahakuba izooba ryarengire. Omu muringo ogwo entumwa (erikushushanibwa nk'enyonyoozi) ahari buri busingye ekaba eri ey'okugarura omushana gw'Omwana. Eki boona bakakikora ahabw'Omwoyo Orikwera.

Paulo akaba ari entumwa y'okubanza kandi akagamba omu Bagalatia 1:8 ngu ku haakubaho maraika weena, entumwa yoon, omuteerani weena, eki yaakuba ari kyona - ku yaakubuurira engiri endiijo etari nk'ei Paulo yaabuuriire, akyeenwe. Paulo akaba naamanya ngu ahanyima y'okugyenda kwe emishega eshuugire ekaba neeza kutaahamu. Akaba naamanya ngu Sitaane, we wenka, naabaasa kureebeka nka maraika w'omushana kaashwa abaheereza be. N'ahabw'ekyo naahabura ngu Engiri egi egume nk'oku eri. Hati Paulo akaba yaabatiize omu Iziina rya Yesu kandi yaagarukire kubatiza abantu abaabaire bataibikirwe omu muringo ogwo. Akata ekanisa omu buteeka kandi yaayegyesa enkoresa ehikire ey'ebiconco by'Omwoyo kandi yaahamya ku byabaire nibiza kuguma omu kanisa okuhitsya obu Yesu ariija. N'ahabw'ekyo entumwa ezaakuratsireho, zoon mukaaga ezaatsigaire, ahabw'Omwoyo Orikwera omwe, zikaba niziza kwaka n'omuriro ogwo kandi zikaba niziza kuheereza omushana ogwo gw'Engiri ya Yesu Kristo n'obumanyiso nibuzireebwamu. Omu buheereza bwa Irenaeus ebyo bikabamu? Eego. N'omu bwa Martin? Eego. N'omu bwa Kolumba? Eego. N'omu bwa Martin Luteeri? Buzima bikabamu. N'omu bwa Wesili? Eego sebo, akaba aine obuheereza bw'amaani kandi nangwa akashabira embaraasi ye kugira ngu ekire kandi yaakira. Nikyo ekyo. Obusingye mushanju bw'ekanisa hamwe n'entumwa mushanju ezaabaire nizishushana, n'ahabw'ekyo Paulo akarangirira omukyeeno ahari ogwo weena oryeyeta entumwa kwonka aine engiri ey'omuringo ogundi kandi atwire omu mushana ogundi.

Hati ebigambo byangye ebi eby'aha muheru nibiikirizana n'Ekigambo kyona? Eego. Ekigambo nikigira ngu omuntu weena ku aryongyera aha kitabo eki nari yaacwaho, aryabonabonesibwa kandi acwerwe orubanja naafubirwa Ruhanga. Ruhanga akagamba ati, “Ndyamwongeraho ebibonaboneso ebihandiikirwe omu kitabo eki nari Ndyamwaka omugabo gwe oguri omu Kitabo ky'Amagara.” Okushuuruurwa 22:18.

N'ahabw'ekyo nitureeba ngu Emyoyo Mushanju buzima neegamba aha Mwoyo Omwe wa Ruhanga naakora okukunda Kwe hamwe n'Ekigambo kya Ruhanga omu busingye obutarikushushana. Niinyenda kworeka eky'okureeberaho ekyo kuruga omu Kigambo. Omwoyo wa Ruhanga akaba ari ahari Eliya omu maani. Bwanyima Omwoyo ogwo yaija ahari Elisa omu maani ageekubiremu kabiri. Bwanyima y'emyaka amagana n'amagana, Omwoyo ogwo Ou turikweta Omwoyo wa Eliya kwenda kushoboorora obuheereza Bwagwo, akagaruka ahari Yohaana Omubatizi. Eizooba rimwe Omwoyo ogwo orikumanyirwa aha buheereza bw'omuringo ogwo aryaija aha mushaija kugira ngu ahendere obusingye bw'ekanisa y'Abanyamahanga. Ogundi murundi: Ekyahandiikirwe nikigamba ngu Ruhanga akashuka ahari Yesu owa Nazareesi Omwoyo Orikwera hamwe n'amaani kandi akaba agyenda hoona naakora ebirungi, naatambira boona abaabaire nibaitwa kubi sitaane. Kandi Yesu obu yaabaire naagyenda akagambira abeegi Be kutegyereza okuhitsya ahari Pentekoote ahu omu bwire obwo Omwoyo Ogwo owaabaire Amuriho yaabaire naija kugaruka akabajjaho akabajjuza. Bwanyima ogwo mubiri “gw'abeetsirwe kurugamu” (ekanisa) gukaba niguza kuba omu mwanya Gwe omu nsi, Gumujwekyere. Kandi ahabw'okuba Ogwo Mwoyo owaabaire Amurimu akaba naija kuba omuribo, bakaba nibaija kukora emirimo erikushushana. Kandi abantu boona abari Omubiri gwa Yesu Kristo omu mazima (ekanisa ey'amazima) nibaija kworeka emirimo erikushushana nk'ei Yesu yaakozire n'ekanisa y'Abapentekoote ahabw'okuba Omwoyo omwe naija kuba abarimu. Ekanisa endiijo yona etaine Omwoyo n'okweyoreka kw'ebiconco neija kuragiirwa kweshoboororaho ahari Ruhanga.

Hanu nikigaruka kigamba ngu enyonyoozi ezi mushanju, nari entumwa mushanju aha busingye mushanju ziri omu mukono Gwe. Azikwaitse. Nookimanya gye ngu ku ziraabe zikwatsirwe omu mukono Gwe ziine akakwate n'amaani Ge. Ekyo nikyo omukono gurikumanyisa. Nigumanyisa amaani ga Ruhanga! Hamwe n'obushoboorozi bwa Ruhanga. Tihaine n'emwe omu ntumwa ezo eyaizire omu maani n'obushoboorozi bwayo. Ekyo nikyo Paulo yaagambire. Tihariho omuntu owaakwehanga kukikora. Nikyetaagisa obushoboorozi bwa Ruhanga n'amaani g'Omwoyo Orikwera. Engiri nebuurirwa omu bushoboorozi bwa Ruhanga n'omu maani g'Omwoyo. Abashaija aba boona Omwoyo Orikwera akaba abahaire amaani. Boona bakaguma nibarwanisa munonga emicwe mibi y'ensi. Bakaba nibabaasa kukikora. Bakaba baijwire Ruhanga. Bakaba BATUMIRWE nari Ruhanga abahaire obushoboorozi HATARI ahabwabo nari abandi bantu.

Hati bakaba baine eki ensi yaabaire etarikubaasa kutunga. Yesu akagira ngu ku Arigyenda Aryayoheereza Omwoyo We Ou ensi etarikubaasa kwakiira. Ekyo kihikire. Ensi, nari entwaza y'ensi terikubaasa Kumwakiira. Ekyo nikyo ekibiina ky'ediini kiri - n'entwaza y'ensi. Nyoreka ekanisa eine entwaza y'ensi haza eijwire Omwoyo Orikwera. Niinyenda kugireeba. Ku waakuunyoreka ekanisa nk'egyo nooba waashanga enshobi omu Kigambo. Ngaaha sebo. Tihariho n'omwe omuri ezi ntumwa owaakozire ekibiina ky'ediini. Obundi bakaba babingwa nari bashohora ahabw'okuba bakaba bashinjwa ekibi ky'ekibiina ky'ediini. Nikibaasika kita Omwoyo Orikwera kuba omu kibiina ky'ediini kandi obwo kiri ekibiina ky'ediini ekiimwire Omwoyo kandi ebigombe by'amadiini birikwimuura Ekigambo? Ijuka, “Ekibiina ky'ediini” ni “RUFU.” Tikirikubaasa kuba omu muringo ogundi gwona. Ensi ku esingura, Omwoyo agyenda.

Eego, ogwo Mwoyo teri Myoyo mushanju kureka n'OMWE. Aryaguma ari otahinduka naakora omu muringo ogutarikuhinduka. Kandi entumwa mushanju ziryagira Omwoyo ogwo omwe kandi zeegyese Ekigambo ekyo kimwe kandi zigire amaani ago gamwe. Kandi ekanisa ku eraabe eri ekanisa y'amazima eryagira Omwoyo ogwo wenyini n'Ekigambo hamwe n'ebikorwa by'amaani ebi baabaire baine ahari Pentekoote. Omu bikorwa eryaba ekanisa y'Ekipentekoote; kandi nihaija kubaho “endimi,” n'okuzishoboorora n'obunabi kandi n'okutambirwa. Ruhanga naija kuba ari ahagati yaayo kandi Ruhanga naija kwerangirira ahagati yaayo nk'oku Atwire naakora. Haleluya! Kandi ekanisa neija kuba ETEEKOZIREMU ekibiina ky'ediini. Ekyo otakyeewa.

Hati nitubaasa kureeba ngu Yesu Kristo Naayeshuuruura omu busingye obu bwona naakozesa Omwoyo We ori omu ntumwa ezo. Entumwa ezo ziri nk'oku Musa yaabaire ari aha Baisraeli. Nk'oku yaabaire aine okushuuruurirwa kw'ebiro bye, nikwo na buri ntumwa yaabaire eine okushuuruurirwa kwa Ruhanga n'obuheereza bw'ebiro byayo. N'ahabw'ekyo twareeba ziri omu mukono Gwe, nitureeba Mukama arikweyoreka ari hamwe n'abashaija aba naabaha amaani Ge. Tikirikugasha kugira ngu Kristo yaakwataniise n'ekanisa yona, eki tureebire obu Areebirwe ayemereire ahagati y'ebikondo by'etabaaza mushanju eby'ezaabu. Nabwo tikirikugasha itwe kureeba obuheereza bw'emirundi etaano obw'omu kitabo ky'Abaefeso eshuura ya kana (entumwa, baanabi, abeegyese, ababuuzizi, abariisa). Ahakuba omuri buri busingye ekanisa ehaba, kandi ti bakuratsi bonka kureka n'ekibiina ky'abakuru b'ediini - abariisa bashobya nk'oku entaama zishobya. Bwanyima Ruhanga Aija aho nk'Omuriisa Omukuru omu buheereza bw'abashaija aba mushanju kwebembera abantu kubagarura aha mazima hamwe n'amaani maingi g'amazima ago. Ruhanga ari omu bantu Be - abantu Be boona, ahakuba omuntu weena ku araabe ataine Mwoyo wa Kristo ti muntu We na kakye. Kandi We ni Kigambo. Ekyo kikaabaire Ekigambo ekirikureebeka omu bantu. Kwonka Ataire obwebembezi obw'omutaano omu bashaija aba abu Ayetooraniire kandi n'okurabira omu naama Ye ei Yaamaririire kimwe nk'oku Yaasiimire. Bareebeka rimwe omuri buri busingye. N'Omwoyo omwe ogwo omuribo. Eki ka kiri hare n'obuhabe bwa Rooma. Baine omuntu ou

beetooraniire - omwe ku arikurugaho nihazaho ondiiho - tihariho n'omwe omuribo orikworeka amaani ga Ruhanga - tihariho n'omwe orikuguma omu Kigambo kya Ruhanga - orikuzaho weena n'ow'omutaano aha waamubandiize kandi naayongeraho eki arikwenda orikushusha oti ni Ruhanga. Ruhanga tari omuri eki. Kwonka Ruhanga ari omu ntumwa Ye kandi ogwo owaakubaire aine obwijwire bwa Ruhanga akaakuratsire entumwa nk'oku entumwa eri omukuratsi wa Mukama ahabw'Ekigambo.

“Ogwo oine Emyoyo mushanju ya Ruhanga, kandi n'ezo nyonyoozi mushanju.” Okushuuruurwa 3:1. Nk'oku Mukama ogu niwe omwe arikweyorekyera omu muntu, Naagaruka Ayeyoreka ari n'omuntu arikumutamu Omwoyo We. “Aba n'Abangye,” nikwo Mukama arikugira. Ezo ntumwa mushanju ezijwire Omwoyo n'eza Mukama. Nizibaasa kutaikirizibwa. Nizibaasa kubanganisibwaho. Omu mazima, omu biteekateeko by'abantu nizibaasa nangwa n'okureebeka zitashemereire - n'obu kiraabe kiri kityo, n'entumwa aha busingye bwazo. Ruhanga akakoresa Abrahamu (akabeiha), yaakoresa Musa (akagoma), Yona (akanga kuhurira), Samusoni (akakora ekibi), Daudi (akaita). Akakoresa na Yohua, na Yosefu. Kandi abo abaine obumogo bw'amaani ni baingi munonga okukira abo abu ebyafaayo byabo birikureebeka bitaine kamogo. BOONA BAKABA, KANDI N'ABE. Tihaine orikubaasa kwehanga kukihakanisa. Akabakoresa ahabwa kandi okurabira omu Mwoyo Orikwera ou Yaabatairemu. Mukama waabo niwe yaabaire naamanya yaaba baabaire beemereire nari bagwire. Kandi omuribo boona okukunda kwa Ruhanga okurikwemariirira kukahikiirira. Reka ebyafaayo eby'aheeru bigyezeho kuhakanisa eki, nikiguma kihikire. Ogwo Ruhanga Otahwaho naakigyenda naataayaayira ebikondo by'etabaaza mushanju eby'ezaabu kandi atuma entumwa Ze ahabw'Omwoyo We n'Ekigambo aha bantu ba buri busingye.

### OKUJUMIIRIRA

Okushuuruurwa 3:1 b, “Nimmanya ebi okora; oine eiziina ry'okuba ohuriire, kwonka ori ofiire.” Okushuuruurwa 3:2 b, “Ahakuba Nshangire omuri byona ebi okora hatarimu kihikire omu maisho ga Ruhanga.” Hati hanu, buzima, hariho ekintu ekirikutangaariza kimwe. Omuri buri busingye okuhitsya na hati Omwoyo okubanza kwa byona yaaba naahimbisa abaikiriza b'amazima, bwanyima ajumiirira omuzaabibu gw'ebishuba. Kwonka omu bwire obu hariho okutataho omutima ahari Mukama n'Ekigambo Kye okugyendereirwe okuhitsya obu obutumwa bwona aha busingye obu bwa kataano niburanga okucwerwa orubanja.

“Nimmanya ebi okora.” Ebi bikaba biri ebikorwa ki ebyahikire omu maisho ga Mukama kandi Bikamuretera okuguubwa kubi? Mpaho, noomanya ngu buri busingye bukaba butaahamu kakye omu busingye obwakurataho, n'ahabw'ekyo twine okugumizamu kw'ebikorwa by'omu busingye bwa kana nibitaaha omu busingye bwa kataano. Ebikorwa ebi nk'oku orikubimanya kurungi ni:

Obwebembezi bw'abantu bukaimuura obwebembezi bw'Omwoyo Orikwera.

Ekigambo kya Ruhanga ekishemeire n'ebirungi byakyo ebya busha aha bantu boona kikahwaho omu mwanya gwakyo baatamu enyegyesa, ebikwate, obuteeka bw'ekanisa, n'ebindi.

Okuramiza omu Mwoyo n'Ebiconco by'Omwoyo hamwe n'ebyo byona ebiine akakwate n'okuteerana okw'amazima okw'abarikwera ab'omu kicweka ekyo kukanagwa aha rubaju baakuhinganisamu okuramya okuragiriirwe abantu, n'okwinamira ebishushani ebikozirwe emikono, amagyenye g'obupagaani, n'ebindi.

Okuramya Mariamu kukaba nikweyongyera munonga omu kuramya kw'Abakristaayo, okuhitsya obu Mariamu buzima yaatwaire omwanya gw'Obwaruhanga kandi Omwana akagarurwa ahansi okuruga omu mwanya Gwe ogw'okuba ow'ahaiguru ya byona kuza hansi y'omuntu orikwetwa paapa, owaayeyetsire omutsigire wa Kristo.

Abo abaarwaniise egi kanisa mbi ya anti-Kristo bakahwerekyerezibwa. Abo abaagumire nayo bakeeshanga bari ebikoreso by'egyo kanisa yaaba baabaire bari abooro nari abagabe. Amagara gaabo gakaba gatari agaabo, kandi nabwo amagara gaabo gakaba gatari ga Kristo, kureka omubiri, omwoyo, n'amagara bakaba bari ab'Ekanisa ya Rooma. Bakaba bagamba aha shagama ya Kristo, kwonka kandi bagura okujunwa kwabo na sente, kandi bagura okusaasirwa ebibi n'esente nari okwebonabonesa. Abatungi munonga omuribo bakashanga eri embeera nungi obu Paapa Leo X yaabaikiriza kugura indalugyensiyo ahabw'ebibi ebitakakozirwe kugira ngu bo n'emitima etarikweshinja bakaabaasa kuteera puraani y'ebihagaro byabo bibi kandi bwanyima bagumizamu kubikora, ahabw'okumanya ngu paapa yaaherize kubasaasira ebibi byabo. Ekigambo kya Mukama kikabasherekwa, mbwenu n'oha owaakumanyire amazima! Obu amazima garuga omu Kigambo honka, abantu bakatsibirwa omu kihome ky'ekanisa ya Rooma, bategyereize okufa, kandi ahanyima y'okufa okucwerwa orubanja. Kwonka ogwo maraaya omukuru, osinzire eshagama y'abaafeereire okwikiriza kandi ataine kiteekateeko ky'okucwerwa orubanja, akagumizamu n'obushaarizi okwita abantu naabaita byombi rufu y'omwoyo n'ey'omubiri.

Hati haihi n'omuheru gw'obusingye bwa kana okwakubaire okutandika kw'obusingye bwa kataano, Constantinople ku yaataahirirwe Abaturuuki kikatuma abeegi abashongokire aba Burugwa-izooba baahungira Burengyerwa-izooba baine ebihandiiko byabo eby'Orugriika. Okushemera kw'Ekigambo n'enyegyesa z'abaikiriza b'amazima bikajanjaazibwa. Kandi abeegyesa aba abarungi tibarabaire ab'omugasho muhango kwonka kureka n'okukora ekyoma ekyahindikire eky'okubandizaho eky'amakorero agarikuteera ebitabo ag'omurembe gwaitu kikajumburwa, kyayangutsya aha kukora ebitabo. N'ahabw'ekyo nitureeba enjara nyingi n'ekyetengo kya Baiburi birikubaasa kugarukwamu. Ruhanga akaimutsya abashaija b'amaani baingi abu Luteeri yaabaire ari omwe

omuribo. Kaluvini hamwe na Zwingili bakaba bari abandi babiri abaabaire nibamanywa munonga, kandi okwongyera ahari aba hakaba hariho baingi, baingi okukiraho abatarikumanywa kurungi. Kwonka, n'obu ebi byona byabaire bitari ebyabusha, umurimo gwa Ruhanga ogw'amaani omu mazima gukaremesibwa abashaija aba bonyini. Ahabw'ekintu kimwe, TIBARAHAKANIISE obushwere bw'ekanisa na gavumenti obw'omu Rukiiko rwa Niika kureka omu mazima bakashagika okwegaita okwo. Ekya gavumenti kurwanirira Engiri kikatangirirwa n'obu haraabe haabaire hatariho Ekigambo ekirikukishagika. Kandi n'obu twakubaasa kureeba "Ekiniga ky'omuntu nikihimbisa Ruhanga," ebyabaireho nk'obu omugabe Henry owa Munaana yaayemerereire okuhunduuza kandi n'okwanga obushoboorozi bwa paapa, kikaba kiri hare n'amazima ga Pentekoote hamwe n'oburinzi bwa Ruhanga ow'obushoboorozi bwona.

N'obu Luteeri yaagumire naayegyesa arikuhakanisa eky'abantu b'aheeru kwetaasya omu nshonga z'ekanisa endiijo tarabaasize kuyegyesa abantu aha ntwaza y'ekanisa eya "Bishopu, Acibishopu." N'ahabw'ekyo ekanisa ekateera entambo emwe omu muhanda oguhikire kwonka nabwo ekaguma ekomirwe omu njegyere, n'ahabw'ekyo omu bwire bukya ekagaruka ogundi murundi yaatsibirwa omu nkomo y'ahansi y'eatika omu yaabaire egyerizeho kutoroka.

Nabwo ekikopo ky'emirimo y'ebihagaro kikaba kitakajwire. Omu kucwamu kwe kubi, Luteeri taraimukiirize abantu kuza omu rugamba kwonka kandi omu buryo obwo kikareetera omutwe muhango gw'abantu kufa; kureka n'ekibiina kya Zwingli kikahiiganisa Dokita Hubmeyer orikutiina Ruhanga, kyamuteesa omu kihome, kandi n'obu kiraabe kitaramuteisize aha nkondo kwokibwa, buzima kikaba nikijunaanwa munonga okwokibwa kwe omu muriro okwakuratsireho. Kandi Kaluvini nawe tarakozire kikye ahari ebi, ahakuba akaragiira okukwatwa kwa Servetus owaabaire yaayetegyereize kandi yaayegyese obumwe bw'Obwaruhanga. Gavumenti ekacwera orubanja ow'eishe-emwe ugu, yaayokibwa aha nkondo ekyareeteire Kaluvini obwoba bwingi.

Ku haakuba harabaireho obwire bw'obweziriki bw'ebigombe by'amadiini bukaba buri obwire obu bw'enaku.

Ebigambo bya Comenius nibishoboorora bingi aha busingye obu. Comenius akahandiika aha "KINTU KIMWE EKIRIKWETENGWA." Naashushanisa ensi n'emihanda eshobenkeine, kandi ayoreka ngu omuringo gw'okugirugamu n'okureka etarikwetengwa, kandi okatoorana kimwe ekirikwetengwa - Kristo. Naagira ngu, obwingi bw'abeegyese niyo nshonga etumire haabaho obwingi bw'ebigombe by'abaikiriza, omu bwire bwa haihi nitwija kubura amaziina g'okubyeta. Buri kanisa eyeteekateekaho nk'ey'amazima, nari shi nk'erikukirayo okushemera, ku niyo kicweka ky'amazima agarikukirayo, obwo umuribo bonka nibahiigana na rwango erikukirayo obubi. Omuribo tihariho amatsiko g'okugarukana; obuzigu babwihura obuzigu obutarikubaasa kuhwaho. Bagunja enyikiriza zaabo ezitarikushushana okuruga omu Baiburi; ezi ziba ebigo by'okwerindiramu byabo n'engo ezi barikweshereka enyima reero barwanisa okutaahirirwa kwona. Tindaagambe ngu okwatura kunu kw'okwikiriza - ahakuba nitubaasa kwikiriza ngu emirundi mingi nikwo kiri - kwo kwonka ni kubi. Nikuba kutyo, n'obu kiraabe, ahakuba kwenegyese omurimo gwa rwango; kureka okuziirahaho kimwe niho kirikubaasika kutandika umurimo gw'okutamba obuhuta bw'Ekanisa. "Aha kushobenkana oku kw'ebigombe by'abaikiriza hamwe n'enyatura ezitarikushushana hariho ekindi; okukunda kuteera empaka" . . . "Harugamu mugasho ki? Hariho obu empaka n'emwe eyaabeegire eraashoboorirwe? Tikikabahoga. Kureka omubaro gwazo gukeeyongyera. Sitaane n'omunyabwengye orikukirayo omu kubeihabeihaga; takasingurwahoga omu kuhakana kw'ebigambo" . . . "Omu buheereza bw'ebya Ruhanga ebigambo by'abantu burijjo bihurirwa munonga okukira Ekigambo kya Ruhanga. Buri omwe aregyeta oku arikwenda, nari shi ashiisha obwire omu kuhakana kw'ebigambo by'abeegire obwo arikuhakanisa ebiteekateeko by'abandi. Aha ky'okuzaarwa busya kandi n'oku omuntu arikuteekwa kuhindurwa akashushana na Kristo kugira ngu akwatanise na Ruhanga omu buteeka Bwe (2 Petero 1:4), haihi tihaine ekirikugambwaho. Aha by'amaani g'ebishumuruzo, Ekanisa haihi tekiine maani g'okuboha, kureka amaani g'okubohoorora nigo gatsigaire" . . . "Amasakramento, agahebwa nk'eky'okureeberaho ky'obumwe, rukundo, hamwe n'amagara gaitu omuri Kristo, gahindwirwe akairi k'omuhondano gw'obushaarizi bwingi, entsibuko ya rwango, eibuganiro ry'okwecwamu ebicweka" . . . "Omu bugufu, Obukristaayo buhindukire orushobenkane. Okwikiriza kwaherize kucuubwamu obucweka bukya rukumi kandi oyetwa omuhakani ku harikubaho kamwe umuribwo aku otarikwikiriza" . . . "Ekirikubaasa kuhwera niki? Ekintu kimwe ekirikwetengwa, garuka ahari Kristo, reeba Kristo nk'Omwebembezi wenka, kandi ogyendere omu bigyere Bye, otaire aha rubaju emihanda endiijo yoona okuhitsya obu twena turaahikye aha kigyendererwa, kandi tukahika aha bumwe bw'okwikiriza (Abaefeso 4:13). Nk'oku Omwegyese w'omu iguru yaayombekire buri kintu kyona aha musingi gw'Ebyahandiikirwe naitwe kitushemereire kureka obuntu bwona obw'okwatura kwaitu kw'omutaano tukamarwa n'Ekigambo ekishuurwirwe kya Ruhanga ekyaitu twena. Twine Baiburi omu ngaro zaitu tushemereire kugamba n'eiraka rihango tuti: Niinyikiriza eki Ruhanga ashuurwire omu Kitabo eki; niinyija kworobera ebiragiro Bye; nyine amatsiko ahari ekyo eki Yaaraganiise. Abakristaayo, mutegye amatu! Hariho amagara gamwe, kwonka Rufu etwizira omu miringo rukumi. Hariho Kristo omwe,

kwonka ba antikristo ni rukumi" . . . "N'ahabw'ekyo nimumanya, Imwe Bakristaayo 'mwe, ekintu ni kimwe ekirikwetengwa. Mugarukye ahari Kristo kitari ekyo nimuza kuhwerekyera nka Antikristo. Ku oraabe oine obwengye kandi orikwenda kuba ohuriire, kuratira Omwebembezi w'Amagara.

"Kwonka imwe, Abakristaayo, mwesiimire omu kutwarwa kwanyu" . . . "Muhurire ebigambo by'Omwebembezi waanyu ow'omu Iguru naagira ati, 'Mwije Ahariinye.'" . . . "Mugarukyemu n'eiraka rimwe muti, 'Nikwo kiri, twaija.'" . . .

Hati ngambire ku obusingye obu bwareetsire okukura kwa jubajuba kw'omwoyo gw'ebigombe by'amadiini. Embeera y'Abakorinso eya "Ndi owa Paulo, ndi owa Keefa," ku yaakuba yaarabaireho, bukaba buri obwire obu. Hakaba hariho aba Luteeri, aba Huss, ekibiina ky'aba Zwingli, n'abandi. Okwecwamu ebicweka kw'Omubiri nk'okwo kukaba nikushwaza. Bakaba batwire eiziina kwonka bafiire. Tihariho kubanganisa bakaba bafiire. Bakafa edakiika ei baayekoziremu ekibiina ky'ediini. Ebibiina bihango bikeekoramu ebibiina by'amadiini kandi byayegaita omu bushwere na gavument. Ekyo kikakikora. Ebyabo bikahwa. Hanu hariho abo aba Luteeri abaabaire nibakyema Ekanisa ya Rooma. Bakaba nibamanya okutahikiirira kw'okwegaita kw'eby'obutegeyeke n'eby'omwoyo - kwonka nabwo Luteeri (nk'obu Petero yaatiinire ab'ediini y'Ekiyudaaya) akagumizamu yaahindura gavumenti omurwanirizi w'okwikiriza, omu mwanya gwa Ruhanga. Eki nikyo kigombe ky'ediini ky'okubanza ekirikumanywa munonga ekyarugire ahari Maraaya, kwonka Luteeri ku yaafiire hakahwaho obwire bukwe kyagarukayo omu madaara g'ebitiinisa g'abeebembezi baakyo nk'ebi kyarwaniise okubanza. Egi nkora ya Ruhanga, omu bwire obu obusingye bwa kabiri butandika kikaba kyagarukire ahansi y'eipapa rya nyina. Eki kibiina ky'ediini kikaba kyagarukire enyima kandi tikirakimanyire. Bakaba beeyetsire eiziina ryabo baryeshumbize Eiziina Rye. Nabo, bakaba batwire eiziina ryabo ahabwabo. Kandi ebigombe by'amadiini byona nibikora ekintu ekyo ebiro ebi. Bitwire eiziina ryabyo ahabwabyo, ritari Eiziina rya Mukama Yesu Kristo. Eki nikirahuka kureebwa ahabw'okuba buri kanisa emanyirwa aha muringo ogu erikuramizamu beitu tihariho n'emwe erikumanywa ahabw'amaani ga Ruhanga. Ekyo nikyo ekigyereso kyawe. Kandi niinyenda ngu oyetegeyeze hanu ngu obusingye obu bukaba butaine obumanyiso hamwe n'eby'okutangaaza omuribwo. Bakareka amaani ga Ruhanga baatwara amaani ga gavumenti. Bakaramatira aha iziina ryabo, amaziina gaabo bakagahindura makuru. Gukaba guri omwoyo ogwa ira ogw'okureeta buri omwe omu itsibikiro ryabo. Ebiro ebi Ababaputisiti nibenda ku Abametsodisiti baija omu Babaputisiti. Abametsodisiti beehaireyo kuhindura Abapuresibateeri. Kandi Abapentekoote nibenda boona. Buri emwe eyegambaho ku erikuha ekirikukirayo kandi ku erikuheereza amatsiko agarikukirayo - nk'orwigi orurikutaasya omu Iguru, nari shi, omuhanda ogurikukiraho oburungi gw'okuzamu. Byona ka nibiteeza enaku.

Omwoyo ogu ogw'ebigombe by'amadiini gureeteire ebigombe by'amadiini byona kuhandiika ebitabo by'enyegyesa zaabyo n'okwegyesa enyikiriza zaabyo, byatandikaho ofiisi zaabyo hamwe n'obutegeyeke bw'ekanisa kandi bwanyima buri kimwe kyegamba ku nikyo, kandi kyo kyonka, buzima ekirikugambirira Ruhanga ahakuba nikyo kihikiire kimwe. Hati eki ku kiraabe buzima kitari eki paapa n'Ekanisa ya Rooma barikukora! Bagarukiireyo kimwe okwo na nyinabo, maraaya ogwo, kandi tibarikukimanya.

Omu kuhendera ebi twagambaho omu mushororongo ogu, "oine eziina ry'okuba ohuriire, kwonka ori ofiire," tindikubaasa kukihamisiririza kimwe ekirenga ahariwe ku obusingye obu, n'obu buraabe bwareetsireho okuhunduuza, Ruhanga akabukabukira munonga omu mwanya gw'okubuhimbisa, ahabw'okuba BUKABIBA EMBIBO Y'EKIGOMBE KY'EDIINI EKAYAYEKOZIREMU EKIBIINA KY'EDIINI KIKAGARUKIRA KIMWE AHARI OGWO MARAAYA, ahanyima ya Ruhanga kwigura orwigi rw'okuhungiramu. Obu enkora y'okuruga aha Kanisa Enkatorika yaabaho, ekaba buzima yona etari y'Omwoyo, kwonka okukira munonga ekaba eri ey'eby'obutegeyeke. Abantu abarikukira obwingi bakatandika kunywana n'Obupurotesitante ahabw'okuba nk'oku ngambire, bakaba nibanga entwaza y'Abarooma ey'obuhuuku bw'eby'obutegeyeke hamwe n'eby'esente. N'ahabw'ekyo, omu mwanya gw'eki kuba enkora nkuru y'Omwoyo einemu obumanyiso bwona bw'Omwoyo Orikwera nk'obu Ruhanga yaakoreise kyarimwe oburyo bw'Omwoyo kuhikiiriza ekigyendererwa Kye ahari Pentekoote, buzima gukaba guri OMURIMO AHU EKINIGA KY'OMUNTU KYAHIMBIISE RUHANGA, kandi ebyarugiremu bikashushana n'ebyafaayo by'Abaisraeli obu baaruga Misri bakazengyerera omu ihamba, batabaase kuhika omu Nsi ya Kanaani. N'obu kiraabe, bingi bikahikiirizibwa ahabw'okuba ahu omugamba gwa Rooma gwabaire guhendeka ekicweka, abantu hati bakaba batunga Ekigambo kya Ruhanga kandi beehayo kukoreshwa Omwoyo bataine kutiina kw'amaani nk'obunyakare. Eki kikaigura orwigi rw'okuza omu busingye bukuru obw'abamiishani obwakuratsireho.

Ogwo Yezebeeli owa Suatira akaba atari omu mbeera z'okurekura abantu, n'ahabw'ekyo nitureeba muhara we Atalia naimutsya omutwe gwe omu Busingye bwa Saadi aine amatsiko ngu naabaasa kuniga embibo y'amazima naakoresa enaama mbi z'ekibiina ky'ediini.

## OKUHABURA

Okushuuruurwa 3:2, "Sisiimuka, ogume nooreeba, ogumye ebikiriho ebiri haihi kufa; ahakuba Nshangire omuri byona ebi okora hatarimu kihikire omu maisho ga Ruhanga."

Nkaabaasibwa ki kigambwa ngu Obusingye bwa Saadi bukaba buri okugarura busya omu mwanya gw'okuhunduuza. Ekyo tindikubaasa kukigamba. Ekigambo tikirikubweta okugarura busya, kwonka buzima nikibweta okuhunduuza. Kuri bwabaire buri okugarura busya, obusingye obwo bukabaire buri obundi busingye bwa Pentekoote. Kwonka tiburabaire bwo. Ekirikukirayo oburungi ekyabugambirweho n'eki, "Ogumye ebikiriho ebiri haihi kufa." Hariho ekyabaire nikibura. Bantu 'mwe, eego, buzima kikaba kirihho. Obusingye obu bukaba bwine okwihwaho orubanja, kwonka bukaba bubuzirweho okwezibwa hamwe n'okubatizibwa n'Omwoyo Orikwera. Egyo niyo yaabaire eri puraani ya Ruhanga eyaabandize. Ekyo nikyo baabaire baine ahari Pentekoote. Bakaba baihirweho orubanja, beeziibwe, kandi bakaba baijuziibwe Omwoyo Orikwera. Ahabw'enki, mpurira, enshonga erikutuma waihwaho orubanja hamwe n'okwezibwa n'okugira ngu aha muheru obaase kubatizibwa n'Omwoyo Orikwera. Egyo niyo nshonga etumire ekanisa eriho. Ni hekalu ya Ruhanga eijwiremu Ruhanga, niwe Mwoyo



Orikwera. Omwoyo ogwo owaabaire ari omuri Yesu obu yaabaire ari hanu omu nsi, owaamukoreise emirimo mikuru ei Yaakozire akagaruka aha kanisa ahari Pentekoote kugira ngu bakore emirimo ei yaakozire. Obusingye obu tiburagizire emirimo egyo. Oo, bakaba baine Ekigambo ekihandikirwe, (kitari Ekigambo ekishuurwirwe). Obu bukaba buri obwire bw'okuhunduuza. Kwonka mutatiina imwe obuso bukuye, Ruhanga akagira ati, "Ndyagarura busya," kandi okuhunduuza oku kukaba nikuza kuba entandikiro yaakwo. Akaba naaza (okurugiirira aha kuraganisa Kwe) kwiha ekanisa omu bi abandi beeta enaama za Sitaane omu Busingye bw'Omwirima okugitwara omu naama za Ruhanga ezi baabaire baine ahari Pentekoote hamwe n'omu myaka mikye y'okubanza y'okubaho kw'ekalisa.

Hati yegyendesereze, kandi oyetegereze eki. Nikigamba omu mushororongo gwa kabiri ogu ogu naashoma kiti, "Ahakuba Nshangire omuri byona ebi okora hatarimu kihikire omu maisho ga Ruhanga." Noomanya amakuru g'ebigambo binu "hatarimu kihikire"? Nibimanyisa ngu "tibuhikiriziibwe." Obusingye obu bukaba buri obusingye obutahikiriziibwe. Ekaba eri entandikiro kwonka ey'okugarukayo. Niyo nshonga eyaatumire naagamba ngu Baiburi ekabweta okuhunduuza - kutari okugarura busya. Bukaba butandikire n'enyikiriza ey'okwihwaho orubanja ekyabaire nikimanyisa ngu okujunwa kwona n'omurimo gwa Ruhanga. Oo, Luteeri ka yaabuuriire obushoboorozi bw'okwemariirira kwa Ruhanga hamwe n'okutoorana. Akamanya ngu byona bikaba biri eby'embabazi. Akataanisa ekanisa n'obutegyeki bw'abakuru b'ediini abatendekirwe abarikukiraakirana omu bitiinisa byabo. Yaashenyagura ebishushani ebirikuramibwa. Yaabingira hare okwaturira abasaserdooti ebibi. Yaahakanisa paapa. Embeera ekaba eri nungi munonga obu yaatandika, kwonka Ruhanga akaba yaagambire emyaka 1500 enyimaho ati, "Luteeri, waaza kutandika ebintu, kwonka obusingye bwawe nibwija kubireeba byona bitahikiiriziibwe, ekyo naakirekyera ebiro ebiriija." Haleluya, Ruhanga waitu ari aha ngoma! Naamanya omuheru kuruga aha kutandika. Eego, Luteeri akaba ari entumwa Ye. Kikaba kitarikushushana nakyo, twashwijuma obweremwa. Kwonka hakaba hariho omushaija orikwetwa Yona, nawe akaba aine obweremwa omu magara ge. Akaba ari nabi n'obu nyowe naiwe twakuba tutarikwenda kugamba tutyo kurugiirira oku yaatwaize. Kwonka Ruhanga naamanya Abe kandi akora nk'oku Arikwenda nk'oku yaatwaize Yona. Akakora nk'oku Arikwenda na Luteeri omu busingye obwo, kandi Naija kukora nk'oku Arikwenda okuhitsya aha muheru.

Hati obu bukaba buri obusingye obutahikiiriziibwe. Bukaba buri obusingye bw'okuhunduuza. Kwonka okwo nikwo Ruhanga Yaabaire naakyenda. Niinyenda kukibashoboororera oku naakishoboororeire ow'eishe-emwe omurungi owa Luteeri mukuru wa seminariyo nungi okwo Burengyerwa-izooba. Nkaba nyetsirwe owe kurya eby'okurya by'omwabazyo nawe n'okumugambira ebikwatiraine n'Omwoyo Orikwera. Akaba naaburabuzibwa n'ebintu bingi reero yangambira ati, "Itwe aba Luteeri twine ki?"

Naagira nti, "Mpaho, mwine Kristo."

Ati, "Nitwenda Omwoyo Orikwera. Nooteekateeka ngu Tumwine?"

Naagarukamu nti, "Omu buryo bumwe, nimwikiriza omu kwija Kumutungu."

Ati, "Noomanyisa ki, 'omu buryo bumwe'? Twiniire Ruhanga enjara. Tukashoma ekitabo aha bya Pentekoote n'ebiconco by'Omwoyo, reero bamwe omuriitwe twatamba enyonyi twaza California kureeba omuhandiiki waakyo. Ku twahikireyo yaatugambira ngu n'obu araabe yaahandikirwe ekyo kitabo, akaba ataine ebyo biconco.

Hati ku twareebire okukora kw'ebiconco omu buheereza bwawe twayetenga kugaaniira naiwe, ahakuba nooteekwa kuba oine eky'orikubimanyaho."

Hati seminariyo y'ow'eishe-emwe ogu eri okwo omu kyarokandi eyetooroirwe zaahiika nyingi z'emisiri omu abeegi barikubaasa kukora kandi bakabaasa kushashurira okwegyera omu koregi. Kandi aine n'amakorero againe akakwate n'emisiri okwongyera aha mirimo erikushashurirwa. N'ahabw'ekyo ndikukoresa emisiri ye kushoboorora enshonga yangye nkagira nti, "Rimwe hakaba hariho omuntu owaagiire omu itaka rye kuhinga omusiri gw'ebicoori. Yaahigira ebitsintsi, yaihamu amabaare, yaahinga kandi yaagwanjara bwanyima yaabyara ebicoori bye. Buri kasheeshe akaba anaga amaisho aha musiri; kwonka akasheeshe kamwe omu mwanya gw'etaka ryonka akareeba obubabi bwingi munonga nibuturuka omu itaka. Yaagira ati, "Ruhanga ahimbisibwe ahabw'omusiri gwangye gw'ebicoori." Reero naamubuuza nti, "Omushaija ogu akaba aine ebicoori?"

Yaagira ati, "Mpaho, omu muringo gumwe akaba abiine."

Naagira nti, "Eego, omu buryo bumwe; haza ekyo akaba ariimwe aba Luteeri omu kuhunduuza, murikutaho eibabi ryanyu, waareeba? Ekicoori kikatandika kukura. (Ahanyima y'okujundira omu itaka omuri obwo Busingye bw'Omwirima). Ahanyima y'engingo nyingi hakabaho emishengye mihango mirungi, kandi eizooba rimwe eshisha ya riiri yaareebeka. Egyo shisha ya riiri ekareeba amababi ahansi yaagira eti, "Imwe aba Luteeri aba ira abaahozire tihaine eki mwine. Mutureebe itwe, itwe nitwe abarikuzara, abamiishani b'amaani. Ebiro byaitu n'obusingye bw'abamiishani." Obwo busingye bw'eshisha bukaba buri Obusingye bwa Wesili. Bakaba bari abamiishani abarikukirayo obukuru kandi nangwa nibatukira omu busingye bwaitu. Obusingye obwo bukakora ki? Bukajanjaara nk'omweyangye omu muyaga.

"Hati entambo eraakurateho n'eha? Twakoresa obwengye bwa buriijo nituteekateeka ngu oku n'okukura kandi n'okushaarura kw'enjuma z'ebicoori - kubyara kuhika aha kushaarura. Kwonka tikwo kiri. Hariho erindi

idaara. Eidaara eryo nimwo ekishushu nari ekishushunga kikorerwa kushweka embibo. Kandi omu bwijwire nikyo kyabaireho omu kicweka eki ky'Omwoyo. Aha kutandika kw'ekyasha kya makumi abiri, omu kutandika kw'Obusingye bwa Laodikea, hakabaho okujanjaara kw'enyikiriza ngu Omwoyo Orikwera akaba naashuuma nk'oku yaashuumire ahari Pentekoote. Abantu bakaba nibagamba omu "ndimi" kandi nibeegambaho kuba babatiziibwe n'Omwoyo Orikwera baine akamanyiso k'okugamba omu "ndimi." Kwonka ndagyendagyenzire omu misiri y'engano emirundi mingi, kandi aho ekyanda kiri haihi kuhwaho naacwa obushiisha bw'engano naabusiitirira omu ngaro zangye kugira ngu ntungye enjuma z'engano, kwonka ekyazire kuntangaaza hakaba HATARIMU AKAJUMA KOONA K'ENGANO OMURI EBYO BISHUSHUNGA, N'OBU OMU MAZIMA KYABAIRE NIKIREEBEKA ORIKUSHUNGA OTI ENJUMA Z'ENGANO ZIKABA ZIRIMU. Eki nikyo kishushani ekihikire ky'enkora egyo erikwetwa Ekipentekoote. Kandi okugira ngu eki n'ekihamiibwe nikishangwa omu kugira ngu aba bantu BAKAKORA EKIBIINA KY'EDIINI AHA NYEGYESA kandi baayeboha baagarukayo nk'oku ebibiina by'amadiini ebyababandiize byakozire, kirikuhama ngu omu mwanya gw'okuba embibo yonyini, bakaba bari ebishushunga nari shi ekyeshweko ky'okurinda embibo y'engano eyaabaire eshemereire kwija. Ekicweka eki eky'ebishushunga bukaba buri obwire bw'akabi obu Yesu yaagambireho omuri Matayo 24:24, "kuhabisa n'entoore, kyaba nikibaasika." Oo, abantu bakateekateeka ngu ekishushu eki, ekirikwetwa Obusingye bw'Abapentekoote ekaba eri embibo y'amazima. Kwonka kikeeyoreka ku kiri eky'okwekorera amagara kugatwara omu busingye omu okugarurwa busya kw'amazima kurikwizira kandi Engano Omugore erikwerekwa omu maani agaagambirweho Ezekieli 47:2-5 ati, "Atyo yanshohoreza omu irembo ry'aha bukiizi-bwa-bumoshu, yanziguurutsya, yampitsya aha irembo ry'aheru eririkureeba oburugwa-izooba; naashanga ago maizi nigashohorera aha rubaju rwaryo rwa buryo. Ogwo muntu yaatoora aha rubaju rw'oburugwa-izooba, naagyera aine omu ngaro omugoye gw'okugyeresha, yaagyera mikono rukumi, yaanyambutsya omuri ago maizi, naashanga nigahika aha bugombamburi. Yaagaruka yaagyera mikono rukumi, yaanyambutsya, naashanga nigahika omu maju. Yaagaruka yaagyera mikono rukumi, aho naashanga nigakwata omunda. Yaagaruka yagyera mikono rukumi; aho gwabo omugyera ogu ntarikubaasa kwambuka; ahabw'okuba amaizi gakaba gajjwire, gari ag'okuziha, omugyera ogutarikwambukwa n'amaguru."

"Kandi omuringo ogu kyakozirwemu gukaba guri omu kukunda kwa Ruhanga okuhikire n'entebeekanisa Ye. Aba Luteeri bakaba baine Omwoyo Orikwera omu buryo bumwe obw'okwihwaho orubanja; Abametsodisiti bakaba Bamwine omu buryo bumwe bw'okwezibwa kandi ebiro ebi Agarwirwe, okugarurwa busya - Omwoyo Orikwera ari hanu."

"Ogume nooreeba, ogumye ebikiriho ebi haihi kufa." Hati ebiteekateeko ebigambirwe omu bigambo ebi bibiri nibyo, "Guma nooreeba" na "Ogumye." Okureeba ti kiine makuru ag'okureeba kwonka kureka n'okuguma oyeteekateekire. Okutaba otyo nikimanyisa akabi n'okufeerwa. Okugumya kiine amakuru agarikukira aha kuha amaani kwonka, nikimanyisa okuhama ekintu kikahama ahabw'obuhangaazi. Ebiragiro ebi bibiri nibigamba aha MAZIMA agatsigaire ageeteekateekire nari "agari haihi" kufa. Emigambire egi ey'Omwoyo neenyizira nk'eky'okureeberaho. Ekibiina ky'abahuuku, ababoheirwe kimwe omu by'omubiri n'omu by'engyesho baherize kugoma kandi batorokire kuruga ahari abo abaabaire bababohire (kandi omu mazima nikyo eiziina Saadi ririkumanyisa: abo abatorokire). Baabairukahohi kandi obusinguzi bwabo bw'amaani kandi obw'ekitiinisa buri nk'obufeire busha. Tibakagarukire kunyagwa, kwonka ekirikubaasa kugambwa ni kimwe ngu batorokire - ti kutoroka bwahwayo nk'oku baingi baabaire bari okurugiirira aha Kigambo. Bakaba bafeereirwe obugabe bwabwo bwingi. Hati Mukama naagira ati, "Omu buryo bumwe nimushushana nk'abagarukire omu bukwatwa; mwerinde mutagarukayo. Okureeba ngu timwagarukayo mweteekateekye kandi mugume nimureeba aha bukwatiraine n'ebintu by'obukwatwa bwanyu kitari ekyo nimwija kufeerwa byona. Hati mwehamye omuri ebyo ebi mutsigazeho omu buryo bw'okuhamiza kimwe ebi mwine reero mubone kwereinda kugaruka kufeerwa. Ogu nigwo guraabe omugisha gwanyu kuhikiiriza ebi mutarahikirize." Kwonka bakagumizamu? Ngaaha sebo. Tibaateire omutima ah'eiraka ry'Omwoyo kandi obusingye obundi bwaza omu bukwatwa n'ahabw'ekyo Ruhanga akaimutsya abandi abaabaire nibaza kukora okukunda Kwe. Ekigombe ky'ediini ky'Abaluteeri Ruhanga akakiraba aha rubaju nk'oku arabire aha rubaju rw'ebindi bigombe, kandi tibirigaruka bundi. Ruhanga akaba ashemereire kugumizamu n'omu busingye obusya areete amazima ageeyongeyireho hamwe n'okugarurwa busya okweyongeyireho.

### OKUCWERWA ORUBANJA

Okushuuruurwa 3:3, "N'ahabw'ekyo oijukye ebi waahairwe kandi n'ebi waahuriire; obihanye, oyeteise. Ahabw'okuba ku oraabe otasisiimukire, okareeba, Ndyaija nk'omushuma; torimanya bunaku obu Ndikuhikiraho."

Niinyenda kushoma envunuura endiijo (Wuest) ey'omushororongo ogu, "N'ahabw'ekyo, guma oijukye omuringo ogu waahairwemu (amazima ago nk'omukwato ogurikugumaho) kandi n'omuringo ogu waagahuriiremu (amazima) kandi ogume noogarinda (amazima), kandi ohindure aha miteekateekyere yaawe ahonaaho." Nikyeyoreka kurungi okuruga omu mushororongo ogu ku Ruhanga yaabahaire amazima nk'omukwato ogurikugumaho. Gakaakiirwa kandi n'agaabo tihariho orikubaasa kugabaaka. Hati ekitsigaire n'okureeba eki baraagakorese, yaaba baraagahe ekitiinisa nari ngaaha. Kandi ago n'amazima. Bakaba bahairwe omusingye gw'amazima g'Engiri yona, "Ohikiire aryaba ohuriire ahabw'okwikiriza," "Okujuna n'okwa Mukama." Bakaba baahuriire amazima ga Baiburi agaanagire kuri enyegyesa za Rooma gakacwa busha obushoboorozi bwona bwa paapa. Bakamanya amazima ngu ekanisa tejuna. Baayetegyeza emeeza ya Mukama. Bakaba baine omushana aha kubatizibwa omu maizi. Baihaho ebishushani ebirukurambwa. Amazima? Buzima hakaba hatakabahoga obusingye

obwabaire bwine abashaija baingi baine omushana mwingi gutyo gw'okumurika. Bakaba baine okumurikirwa okurikugasha okuhindurira kimwe enkora eya ira nari okutandika busya kandi bakareka Ruhanga akabeebembera, omushorongho aha mushorongho n'ekiragiho aha kiragiho. Bakaakiira amazima. Bakaba nibageetenga kandi baagahurira. Kwonka ekibuuzo kikaba kiri ngu, bakagahurira bata? Bakagahurira kugombekyeraho nari bakaba baine embeera nk'ei Abagriika baingi baabaire baine - ekintu eky'okuhaajaanaho kandi eky'okuteebereza? Ekyabaire nikyeyoreka Ekigambo ekijwire obutungo ky'amazima kikaba nikihurirwa omu buryo bw'obwenge bw'obuntu, omu mwanya gw'okukita omu nkora, ahakuba Ruhanga akaba naaragiira okuhindura omu biteekateeko ahariyo. Eki ku kiraabe kiri Ekigambo kya Ruhanga, kandi omu mazima nikyo, obwo nikiteekwa kworoberwa. Okwanga kuyorobera nikureeta kucwerwa orubanja. Abarinzi ba hekalu erikwera ku baabaire bashangwa bagwejegeyeire, bakaba bateerwa kandi n'ebijwaro byabo byokibwa. Mukama naija kukorera ki abo abatakyafayo eby'okwerinda kwabo omu busingye obu?

“Ndyaija ah'ori nk'omushuma.” Saadi eya ira ekaba eguma neenyangarazibwa abambuzi abaabaire bashuuma nibaruga omu nshozi kandi banyaga abantu. N'ahabw'ekyo bakamanya kurungi eki Omwoyo yaabaire naagamba omu kugamba ngu, okwija kwa Mukama ni nk'omushuma. Kuguma nooreeba hamwe n'okweteekateeka byonka nibimara okwetebeekanisiza okwija Kwe. Hati nitumanya ku obutumwa obu buri obw'omuzaabibu gw'ebishuba, ahakuba okwija kwa Mukama kuryaba nk'oku kyabaire omu biro bya Noa. Abo munaana abaajunirwe bakaba nibamanyira kimwe omwegyemure gw'amaizi ogwabaire nigwenda kwija, kandi ahabw'okugumanya bakeeteekateeka kandi baajunwa. Kwonka ensi ey'abatatiina Ruhanga ekamarwaho. N'obu buriizooba baabaire babugana abahikiriire kandi bahurira amazima, bakanga amazima okuhitsya obu obwire bwabahweireho. Abo bantu abaijuriire kimwe obunyamubiri ab'omu bwire obwo obwa ira ebiro ebi nibashushanisa abarikweyeta Abakristaayo abu amagara gaabo gajwire ebintu by'ensi, kandi babishemererwamu okuhitsya obu bataine kyetengo ky'eby'Omwoyo, kandi tibarikumanya na kakye, n'obu kwakuba okweteekateekyera okureebeka Kwe.

### OKUSIIMA

Okushuuruurwa 3:4, “Kwonka oine amaziina makye g'abantu b'omuri Saadi, abatarasiisire bijwaro byabo; abo baryagyenda Naanye bajwaire ebirikwera, ahakuba babishemereire.”

Tihariho kubanganisa ekigambo “amaziina” nikimanyisa “abantu” nk'oku kirikugamba omu kitabo ky'Ebyakozirwe 1:15 ebikwatiraine n'abo abaabaire bari omu kishengye ky'ahaiguru “(omubaro gw'amaziina g'abaabaire bateeraine, gukaba guri nka 120.” Kwonka ahariinye kiine amakuru agarikukira aha kworeka abantu; nikyoreka amazima ago agagambirweho omuri buri busingye agu Mukama waitu yaatugambiire n'okuhamisiriza kwingi. Nigo aga: enkora y'ekanisa y'obusingye obu erimu emizaabibu ebiri, ogw'amazima n'ogw'ebishuba. Ruhanga omu kigyendererwa ky'obukuru bw'okwemariirira Kwe yoona agitaire hamwe, Naagyeta ekanisa. Reeba omu busingye obu oku Abakabukiire naagira ati, “ekanisa ey'omuri” - ti “amakanisa agari” omuri Saadi - kureka Naagagaita hamwe - “ekanisa ey'omuri” . . . “Nimmanya ebi okora” . . . “ori ofiire” . . . “emirimo yaawe tehikiiriziibwe.” Kandi bwanyima Agumizamu - “Iwe (ekanisa egi ey'omuri Saadi) oine abantu bakye omuriiwe barungi, batari babi nk'abandi abarikukira obwingi. Aba bagyendera omu bijwaro ebishemeire kandi Banshemereire.” Hati abantu aba abaabaire bari abarikwera b'amazima ba Ruhanga bakaba nibagyenda “boona nibashemeza Mukama.” Ebijwaro byabo bikaba bishemeire. Nooreeba omu biro ebyo ebijwaro bikaba bigyenda nibikora ahansi omu muhanda reero bizaho enziro n'oburofa. Aba bakaba nibeegyendesereza oku baabaire nibagyenda kugira ngu ensi etabashiisha. Bakaba bari omu Mwoyo kandi nibagyendera omu Mwoyo. Bakaba bari abarikwera kandi bataine kamogo omu maisho Ge. N'ahabw'ekyo bakaba nibahikiiriza ekigyendererwa kyabo ahakuba ekyo nikyo Abaefeso 1:4 erikugamba ngu nikyo kigyendererwa kya Ruhanga ahariitwe, “ngu tube abarikwera abataine kamogo omu maisho Ge.”

Hati okuruga omu mushorongho ugu ogurikworeka entoore za Ruhanga ku “n'amaziina makye,” noobaasa kureeba kurungi eki tubaire nitwegyesa aha busingye obu. Bukaba buri obw'akatabanguko. TIBURAHIKIRIZIIBWE. Bukaba bwebaganiisemu munonga, kandi Ruhanga akabujuukirira haihi obwire bwona obu bwamazire. Bukaba bwine amaani makye kandi burwaire buri haihi kufa. Bukaba butari obusingye bw'ekitiinsa obu ab'ebyafaayo Abapurotesitante abarikuteekateekyera omu by'omubiri bagyerizeho kubweta. Okunaga amaisho juba aha muti ogwo okaba oreeba ku gujuzire kandi ku gurwaire kutsya nyamwenga, amababi gaguhweireho gutarikwana bijuma kureka bimwe ebisiisikaire kandi birimu enyogori ebyabaire nibirahuka kuragara ahansi. Kwonka rindaho kakye! Reeba otaireho omutima. Aho aha mutwe, omu mushana gw'eizooba, hakaba hariho bimwe aha “bijuma by'omuganuro” - “Amaziina Makye” - abahikiriire Omuriwe ahakuba Niwe yaabazaire, Aijwire omuribo kandi nibagyenda Nawe omu Kigambo Kye.

Ruhanga asiimwe “ahabw'abo abakye.”

“Abo baryagyenda Naanye.” Ekyo nikyo Ruhanga arikugamba ngu Aryabaheereza ahabw'okugyenda gye oku. Ekyo n'ekicwika ky'obuhunguzi bwabo eki Yaababiikiire. Ku baraabe baabaire nibaikiriza kugyenda Nawe omu mirabanamu n'emitego y'amagara kandi n'okuba ab'ekitiinisa Ahariwe, Akaba naaza kubaha ebihembo. We tabaasa kwebwa emirimo yaitu ya rukundo. Ruhanga Aryaguma naatuzimurira ahabw'okugyezaho kwaitu kumushemeza.

Eego, bakaba baarabire omu nsi kwonka tibarakwataniise nayo. Tibaraikiirize emitwarize y'ensi kubasingura.

Ago maziina rurangaanwa ag'omu busingye obwo ku gaayehaireyo kubehabehwa akarimi karungi ka gavumenti kandi gakatoorana okuta omutima aha by'obutegeye omu mwanya gw'okuta omutima aha by'Omwoyo obwo barikugarukayo omu nsi, aba bakye bakarwanirira Ekigambo kya Ruhanga, kandi omu buryo obwo baaheereza Mukama ekitiinisa. Hati omu kubaihura Nawe naija kubaha ekitiinisa. Ahakuba nibaija kugyenda Nawe bajwaire ebirikwera. Bakaba beeyorekire ku bari hamwe Nawe omu nsi mbwenu hati Naija kweyoreka nabo omuri Yerusalemu Ensy. Okweyoreka okwo ka nikwija kuba okurikutangaaza! Nikituma naayesiima kandi nabwo kituma naarira okuteekateeka aha kwegarura ahansi Kwe, ahakuba noiya kwetegyereza ku atajwaire erangi endiijo ey'omutaano aha y'abarikwera, nk'oku abeebembezi b'ensi baakukozire. Ngaaha, nibashushana Nawe; Nawe naashushana nabo. Nibashushana Nawe, nk'oku Yohaana yaagizire ati; "ahakuba Nibamureeba nk'oku Ari."

"Ahakuba babishemereire." Nooyetegyereza Orikugamba eki? Ni Yesu, Ogwo Oshemereire, We wenka. Ogu Niwe wenka oshemereire kwiha ekitabo omu mukono gw'Ogwo Oshutami aha kitebe ky'obukama. Kandi hati Ogu Oshemereire naagambira abarikwera Be ati, "Mushemereire." Hanu hariho Ogu, Omwe wenka ohikire kucwa orubanja, (kandi buzima kucwa emanja kwona kukamurekurirwa,) Naagira ati, "Mushemereire." Ebigambo ebi nibitangaaza munonga nk'ebigambo ebiri omu Barooma 8:33 b, "Ruhanga naagira ngu, ndi ohikiriire." (Baiburi eyaahindwirwe Way.) Aho omu mushana ogurikwera ogw'okuhikiirira kwa Ruhanga, hurira eiraka rirungi rya Yesu Naagira ati, "Aba n'Abangye. N'Abahikiriire. Bashemereire. Baryagyenda Naanye bajwaire ebijwaro ebirikwera."

### OKURAGANISA OMUSINGUZI

Okushuuruurwa 3:5, "Orikusingura aryajwekwa atyo ebijwaro birikwera, kandi tindiiha iziina rye mu Kitabo ky'Amagara, kureka Ndyarihamya omu maisho ga Tata n'omu maisho ga baamaraika Be (abarikwera)."

"Orikusingura aryajwekwa atyo ebijwaro ebirikwera." Omu mazima oku n'okugarukamu omushororongo gwa 4, ahu kirikugamba ahari bakye abatarasiisire bijwaro byabo. Emyaka ehweire tukaba twine orufumu hatariho kubanganisa orwabaire rwihirwe omu mushororongo ogu. Rukaba ruri ngu, "Murinde ebijwaro byanyu bigume bishemeire." Rukaba nirumanyisa: reka kwejwanzya omu bintu ebirikubanganisibwaho; abandi nibaija kubibamu kandi naiwe noobaasa kwohibwa kubyejwanzyamu, nari omuntu naabaasa n'okugyezaho kubikujwanzyamu; kwonka byona obyetantare noobiza hare. Hati Ruhanga naija kuha ebihembo abo abarikukuratira okuhabura oku. Nibaija kujwekwa ebirikwera nk'oku Nawe ajwaire ebirikwera. Petero, Yakobo na Yohaana Bakamureeba aha Rushozi rw'Okuhindurirwaho kandi ebijwaro Bye bikaba nibyera nk'omushana. Okwo nikwo abarikwera baraije kujwekwa. Ebijwaro byabo nibiija kuba nibyengyengyeta, nibyerera kimwe.

Noomanya ku tutwire omu bwire bw'aha muheru. N'omuri obu busingye obu amakanisa garaije kwegaita hamwe. Kandi nk'oku na hati garikutegyeka eby'obutegeye by'ensi, omu bwire bwa haihi nigaija kutegyeka esente z'ensi. Reero, ku oraabe otari omu kibiina ky'amakanisa g'ensi, torikwija kugura nari kutunda. Noiya kufeerwa byona. Abo abarikuguma bari abeesigwa ahari Ruhanga kandi abarikurinda ebijwaro byabo bikaguma nibyera bitasiisirwe "entwaza y'ensi" egi y'ebiragiyo by'ekandisa nibaija kugira obusaasi ahabw'okwakwa byona. Nibaija kwohibwa n'amaani kugira ngu baikirize. Ababuurizi nibaija kworoba na rwekwatso y'okugira ngu nibaija kuheereza Ruhanga omu ntwaza y'enyamaishwa ya antikristo. Nibaija kwikiriza kumamarikwa n'okubehabehwa akarimi karungi k'abakuru b'ediini. Kandi abantu nibaija kukuratira abariisa aba ab'ebishuba baitwe. Kwonka omu kucwerwa orubanja boona baryashangwa bajwaire busha. Tibariheebwa ebyo bijwaro ebirikwera; n'obu kwakuba okugyenda Nawe. Torikubaasa kugyenda ojwaire ebijwaro ebiine amabara g'ensi, okwatane emikono na sitaane hanu, reero okateekateeka ngu ori na Ruhanga. N'obwire bw'okusisiimuka okahurira eiraka rya Ruhanga naagamba munonga ati, "Mururugyemu (ebibiina by'amadiini) imwe bantu Bangye 'mwe, mutakaakwatanisa narwo omu bibi byarwo, mukaheebwa ekifubiro ky'ebirikwija kurubonabonesa." Amiina. Ruhanga naagamba. Yetantare amadiini g'ensi egi nk'oku orikwetantara endwara erikurahuka kujanjaara kandi ekaita abantu baingi munonga omu kaanya kakye. Rekyer'aho kugyenda n'ensi

kandi ebijwaro byawe obyeze n'eshagama y'Omwana gw'Entaama kurabira omu kweteisa. Kwonka kikore hati, ahakuba nyencakare obwire nibubaasa kuba bwahweire.

"Orikusingura . . . Tindiiha iziina rye mu Kitabo ky'Amagara." Ogundi murundi twahika aha kicweka ky'Ekigambo ekigumire munonga. Omushororongo ogu ku gurikutwarirwa eryo nigukoresibwa bombi ab'ediini ya Arminia n'ab'ediini ya Kaluvini kuhikiiriza ebigyendererwa byabo. Aba Arminia nibaija kurangirira ngu omushororongo ogu buzimazima niguhindura busha Yohaana 6:37-39, 41-44, "Abu Tata Ampa boona baryaija Ahariinye; orikwija Ahariinye Tindimubinga na kakye. Ahakuba Tindarugire mu iguru kukora ebi Ndikweyendera, kureka okukora ebi Owantumire Akunda; kandi eki nikyo Owantumire akunda, ngu ahari boona abu Yampaire, harekye kuburaho n'omwe, kureka Mbazoore aha kiro ky'aha mperu." "Ekyo nikyo kyareeteire Abayudaaya Kumwetomboitera, ahabw'okuba Akagira ati: Niinye mugaati ogwarugire omu iguru. Baagira bati: Ogu tiwe Yesu mwene Yosefu, Ou turikumanya ishe na nyina? Mbwenu naabaasa ata kugira ngu akaruga omu iguru? Yesu yaabagarukamu ati: Muteetomboita mwenka. Tihariho orikubaasa kwija Ahariinye, Tata Owantumire yaaba atamwiriize haihi; Naanye ndyamuzoora aha kiro ky'aha mperu." Aba Arminia bahindura okukunda kwa Isheboona, nk'ekitari kigyendererwa ky'okwemariirira kwa Ruhanga, kureka kiri okuhurira amazirwe omu kyetengo Kye obwo Ayemereire hangahari kureeba oku abantu barakorese ebiconco Bye ebirungi kandi eby'embabazi, kandi nangwa n'amagara agatahwaho.

Aba Kaluvini tibarikureeba ekyo. Omu mushororongo ugu nibareebamu okuuumuriza kw'amaani okwahairwe abarikubonabona, abarikwera abaremereirwe, ngu n'obu obwire bwakuba bubi buta, n'okuhiigwa kukatiinisa kuta, ahabw'okuba omusinguzi n'ogwo "orikwikiriza ku Yesu ari Kristo," eiziina rye tiririhwa omuri ekyo kitabo. Bamwe nabwo bagamba ku "Ekitabo eki eky'Amagara" kitari "Ekitabo ky'Omwana gw'Entaama eky'Amagara." Kwonka nka buriijo, omuntu ku areebera eryo omushororongo, aihamu okwetegyereza okutakwatiraine.

Eky'okugira ngu nikibaasika iziina kwihwa omu bihandiiko bya Ruhanga nikiyetenga okwega okurikukira okw'obutoosha, ahabw'okuba okuhitsya na hati abeegi abarikukira obwingi bahikire aha kucwamu ngu Ruhanga ata amaziina g'abo abazairwe obwa kabiri omu Kitabo ky'Amagara eky'Omwana gw'Entaama baazaarwa busya; kandi ku haakugira enshonga eyaatuma eiziina eryo ryayetengwa kwihwamu, ogwo mwanya omu bihandiiko niguguma gurimu busha nk'oku gwabaire guri omu kubanza iziina ritakateirwemu. Eki nikitaanira kimwe obucweka igana ahari igana n'eki Ekigambo kyegyesa buzima.

Aha kutandika kw'okwega kwaitu, ka kimanywe ku HATARIHO Ekyahandiikirwe na KIMWE ekyegyesa ngu Ruhanga obwa hati Naahandiika amaziina. Ebi byona bikakorwa ensi etakahangirwe, nk'oku turaaze kukyoreka juba. Kandi nabwo, tikugira ngu n'okufa kuta omutima aha bibiina bibiri by'abantu byombi ebyabaire biine omugisha gw'okuheebwa amagara agatahwaho, ahu ekibiina kimwe kyagaakiriire n'amaziina gaabo gakateebwa omu kihandiiko kandi ekindi ekyagangire amaziina gaabo gatateebwemu gatyo. Omu mazima nitwija kworeka omu Byahandiikirwe ngu omutwe muhango gw'abantu nangwa abaabaire batazairwe obwa kabiri bariza omu magara agatahwaho. N'obu kiraabe nikihurirwa kiri nk'eky'omutaano, buzima kihikire. Nitwija nabwo kworeka ku hariho ekibiina ky'abantu abu amaziina gaabo ahanyima y'okuteebwa omu kihandiiko ekyo ensi etakahangirwe, AMAZIINA GAABO N'OBU HAKUBAHO KI TIGAKAIHWAMU; kwonka nabwo nitwija kworeka ku ekibiina ekindi ABU AMAZIINA GAABO GAABAIRE GARI OMU KIHANDIIKO EKYO ENSI ETAKAHANGIRWE AMAZIINA GAABO GARYEIHWAMU.

Eky'okubandizaho, tihariho kirikuhama eky'okugira ngu "Ekitabo ky'Amagara eky'Omwana gw'Entaama" tikirikushushana "n'Ekitabo ky'Amagara." Ekitabo ky'Amagara nikibaasa kwetwa Ekitabo ky'Amagara eky'Omwana gw'Entaama, nari Ekitabo kya Kristo ky'Amagara, nari Ekitabo Kyawe nari Ekitabo ky'Abahuriire. Amaziina gonka nigo gahandiikirwemu. Okushuuruurwa 13:8, "Boona abatuura omu nsi baryagirama (enyamaishwa), abu amaziina gaabo gatahandiikirwe mu Kitabo ky'Amagara eky'Omwana gw'Entaama owaitsirwe okuruga aha kuhangwa kw'ensi." Okushuuruurwa 17:8, "Enyamaishwa ei waareba ekaba eriho, hati teriho, neeyenda kuruga omu kiina ekitane bugarukiro, eze omu kuhwerekyerera; kandi abatuura omu nsi, abu amaziina gaabo gatahandiikwaga mu Kitabo ky'Amagara okuruga aha kuhangwa kw'ensi, baryatangaara ahabw'okureeba enyamaishwa egyo, ahakuba ekaba eriho, mbwenu teriho, haza kandi neija kubaho." Okushuuruurwa 20:12-15, "Naareeba abafu, abakuru n'abato, beemereire omu maisho (ga Ruhanga), ebitabo byashuuruurwa. N'ekitabo ekindi kyashuuruurwa, nikyo (Kitabo) eky'Amagara. Abafu baacwerwa emanja z'ebyahandiikirwe omu bitabo nk'ebi baakoze oku biri. Enyanja yaagarura abafu abaabaire bagirimo, na rufu n'okuzimu byagarura abafu abaabaire bariyo; boona baacwerwa emanja ez'ebi baakoze. Rufu n'okuzimu byanagwa omu nyanja y'omuriro. Egyo nyanja, y'omuriro nikwo kufa okwa kabiri. Kandi omuntu weena, ou eiziina rye ryabaire ritahandiikirwe mu Kitabo ky'Amagara, yaanagwa omu nyanja y'omuriro." Noobaasa kureeba ngu n'obu haraabe hariho ebitabo ebindi ebigambirweho, hariho Ekitabo KIMWE ekirikugambwaho obwire bwona ekirimo amaziina. Omu kitabo ky'Okushuuruurwa nikiyetwa "Ekitabo ky'Amagara eky'Omwana gw'Entaama," nari "Ekitabo ky'Amagara."

Hati Ekitabo eki nikishangwa nkahi? Luka 10:17-24, "Abo beegi Be makumi mushanju baagaruka n'okushemererwa, nibagira bati: Mukama waitu, na baadaimoni nibatworobera omu Iziina Ryawe. Yaabagira ati: Ndeebire Sitaane naagwa nk'omurabyo okuruga omu iguru. Reeba, naabaha obushoboorozi bw'okuribata enjoka na skorupio n'amaani goona ag'omuzigu; kandi tihariho kintu ekiribakora kubi. Kwonka eki mutakishemererwa baadaimoni okuboorobera; kureka mushemererwe ahabw'amaziina gaanyu kuhandiikwa omu iguru. Omu shaaha egyo (Yesu) yaashemererwa omu Mwoyo Orikwera, naagira ati: Ninkusiima, Taata, Mukama w'eiguru n'ensi, ahabw'okuba ebyo Okabishereka abanyabwengeye n'abarikwetegyereza, waabishuuruurira abaana bato. Eego, Taata, ahakuba ekyo nikyo Waasiimire. Ebintu byona Nkabiheebwa Tata; kandi tihariho orikumanya Omwana oku ari kureka Ishe, n'obu yaakuba orikumanya Ishe oku ari kureka Omwana, n'omuntu weena ou Omwana aikiriza kumumushuuruurira. Yaahindikira abeegi Be, yaabagambira omu mubonano ati: Amaisho agarikureeba ebi murikureeba gaine omugisha. Nimbagambira nti: Baanabi n'abagabe baingi bakeetenga kureeba ebi murikureeba, tibaabireeba, kandi n'okuhurira ebi murikuhurira, tibaabihurira." Ekitabo ky'Amagara tihariho kubanganisa nikishangwa omu iguru, kandi kiryareebeka aha Kitebe ky'obukama Ekikuru Ekirikwera eky'okucweraho emanja. Omu mishororongo egi Yesu akagamba ku AMAZIINA gaabo gaabaire gahandiikirwe omu iguru. Gakaba gahandiikirwe omu Kitabo ky'Amagara, ahakuba omwo nimwo amaziina gahandiikwa. Yesu akaba naagambira abo makumi mushanju (omushororongo gwa 17), beitu nabwo Akaba naagambira abo ikumi na babiri (omushororongo gwa 23). Aba boona bakaba nibeesiima ngu baadaimoni bakaba nibaboorobera omu Iziina rya Yesu. Okugarukamu kwa Kristo kukaba ngu, "Kwonka eki mutakishemererwa baadaimoni okuboorobera, kureka mushemererwe ahabw'amaziina gaanyu kuhandiikwa omu iguru (Ekitabo ky'Amagara)." Noiija kwetegyereza hanu ku Yuda yaabaire ari omwe omu baabaire nibabinga baadaimoni omu Iziina rya Yesu, kwonka nitumanya ngu akaba ari sitaane, omwana w'okuhwerekyerera. Yohaana 6:70-71, "Yesu yaabagarukamu ati: Tiinye naabatooraine imwe ikumi na babiri? Kwonka omwe omuriimwe ni sitaane. Ekyo akakigamba ahari Yuda

Iskaryota mwene Simooni, owaabaire naayenda Kumureebya, omwe ahari ikumi na babiri.” Yohaana 17:12, “Obu Naabaire nkibaine (omu nsi), Nkabarindira omu Iziina Ryawe eri Wampaire, Nkabarinda, tihaine n'omwe owaabuzire, kureka omwana w'okuhwerekyerera, ngu Ebyahandiikirwe bihikiirizibwe.” Yohaana 13:10-11, 18, “Yesu yaamugira ati: Owaayogire, tashemereire kindi kureka okunaaba aha bigyere byonka; ahabw'okuba aba naayera weena; kandi imwe nimwera, kwonka ti mwena. Ahakuba akaba Naamanya Oraamureebye; nikyo Yaagiriire ati: Mwena timurikwera.” “Tindikubagambaho mwena; Nimmanya abu Naatooraine; kwonka Ekyahandiikirwe kihikiirire ngu, Owaarya aha by'okurya Byangye, niwe Ambangiire omugyere.” Hati orurimi ku ruraabe rwine eki rurikumanyisa kyona tushemereire kwikiriza ku Yuda yaatoorainwe Yesu (Yohaana 13:18), kwonka akaba atarikwera (Yohaana 13:10-11). Yuda nawe Tataitwe niwe yaamuhaira Yesu. Yohaana 17:12. (Ka kyetegereziibwe hanu ku “okutoorana” n'okuha nibishushanira kimwe nk'omu ky'okureeberaho kya Musa na Faraho, Yakobo na Esau, ahakuba n'obu bombi Esau na Faraho baamanyirwe ira batakabaireho, bakateekateekyerwa ekiniga, kunu omuheru gwa Musa na Yakobo guri ekitiinisa. 1 Petero 2:8-9a nihooreka bombi abatarikusiimwa n'entoore “bateera entsibo, ahabw'okuba tiboorobera Kigambo, nk'oku baakiteereirweho ira. Kwonka imwe muri oruganda orutoorainwe.”) Yuda akabarirwa omuri abo ikumi na babiri kandi omu mazima akaba aine omugabo hamwe nabo omu buheereza Pentekoote etakabaireho. Ebyakozirwe 1:16-17, “B'eishe-emwe, Ebyahandiikirwe bishemereire kuhikiirizibwa ebi Omwoyo Orikwera yaarangiire omu kanwa ka Daudi ahari Yuda, owaayebembeire abaizire kukwata Yesu. Ahabw'okuba akaba naabarirwa hamwe naitwe, yaaheebwa omugabo gw'obuheereza obu.” Omugabo ogu Yuda yaabaire atungire omuri ikumi na babiri bwanyima akagufeerwa gukaba gutari ogw'ahansi y'obuheereza bw'abari ikumi n'omwe, kandi bukaba butari obuheereza bw'enduga-mahanga bwa sitaane obuhagikirwe omu buheereza bwa bari abandi. Ebyakozirwe 1:25, “Atware omwanya gw'obuheereza obu n'obutumwa, obu Yuda yaarugiremu akegyendera.” Yuda, sitaane, akafeerwa obuheereza bw'Omwoyo Orikwera obu yaabaire ahairwe Ruhanga, yaayeita kandi YAAZA OMU MWANYA GWE. Eiziina rye naryo rikaba riri omu Kitabo ky'Amagara. Kwonka eiziina rye ryaihwamu.

Hati tutakakuratiire ekiteekateeko eki ahari Yuda, ka tugarukye enyima omu Ndagaano eya Ira tureebe ahu Ruhanga yaakozire ekintu ekirikushushana nakyo. Omu Kutandika 35:23-26, batabani ba Yakobo bakaba bari ikumi na babiri kandi amaziina gaabo gakaba gari: Reubeeni, Simeoni, Leevi, Yuda, Isakaari na Zebuluuni; Yosefu na Benyamini; Daani na Nafutaali; Gaadi na Asheri. Abaakomookire omu batabani aba ikumi na babiri bakaba enganda ikumi na ibiri za Israeli oihireho ngu Yosefu taragizire ruganda orurikumwetererwa, ahakuba omu kumanya ira kwa Ruhanga hakaba nihaija kubaho enganda ikumi na ishata, kandi batabani ba Yosefu babiri bakaheeba ekitiinisa ky'okuhindura enganda ikumi na ibiri kuba ikumi na ishata. Noomanya, hatariho kubanganisa, ku eki kyabaire nikyetengwa ahabw'okuba Leevi akaba ashororoirwe Mukama ahabw'obunyamurwa. N'ahabw'ekyo Abaisraeli ku baarugire Misri kandi Ruhanga akabaha eihema omu ihamba, nitushanga oruganda rwa Leevi niruheereza enganda ikumi na ibiri abu amaziina gaabo gari Reubeeni, Simeoni, Isakaari, Yuda, Zebuluuni, Benyamini, Daani, Nafutaali, Gaadi, Asheri, Efuraimu na Manaase. Okwo nikwo amaziina gaabo garikukuratana omu kitabo ky'Okubara 10:11-28. Yosefu tarikugambwaho nari Leevi. Kwonka ku turikureeba omu Kushuuruurwa 7:4-8, aharikugira ngu, “omubaro gw'abaatairweho akamanyiso, ogwabaire guri akasiriira n'obukumi buna n'enkumi ina, abaarugire omu nganda ZOONA ez'abaana ba Israeli,” amaziina nigakuratana gati: Yuda, Reubeeni, Gaadi, Asheeri, Nafutaali, Manaase, Simeoni, Leevi, Isakaari, Zebuluuni, Yosefu, Benyamini. Twagaruka aha nganda ikumi na ibiri Leevi na Yosefu babariirwemu, kwonka enganda za Daani na Efuraimu zitarimu.

Ekibuuzo hati nikiija, ahabw'enki enganda ezi ibiri zaasangwirwemu? Eky'okugarukamu kiri omu ky'Ebiragiro 29:16-20, “(Nimumanya oku twatwire omu nsi ya Misri, kandi n'oku twarabire omu mahanga agu mwarabiremu; mukareeba ebirikunugwa byabo n'ebishushani byabo ebirikuramibwa, eby'ebiti, eby'amabaare, eby'efeeza, n'eby'ezaabu, ebyabaire biri omuribo.) Mwerinde, omuriimwe hatarigira omushaija nari omukazi nari omuryango nari oruganda, ou omutima gwe gwateishuka gukaruga ahari MUKAMA Ruhanga waanyu, akaza kuheereza baaruhanga ab'ago mahanga, kandi hatarigira omuriimwe owaamerwamu omuzi ogurikwana ebyana ebirikushaarira nk'omuravunga; akihurira ebigambo by'endagaano egi, akeehimbisa omu mutima gwe, naagira ati: Tiinyine ku ndiba, n'obu ndigumizamu n'obugangaazi bw'omutima gwangye; atyo akareetera ababisi n'aboomire kucwekyerera. Omuntu ogwo MUKAMA tarimusaasira, kureka ekiniga kya MUKAMA n'eihato Rye biryamwakaho nk'omuriri omuri obwo bunaku, emikyeeno yona ehandiikirwe omuri eki kitabo emubeho, kandi MUKAMA aryamaraho eiziina rye, ryebe ahansi y'eiguru.” Hanu harangirwe omukyeeno aha barikuramya ebishushani nari abarikushambana omu buryo bw'omwoyo. Oruganda orwabaire ruhindikira kuramya ebishushani eiziina ryarwo rikaba riihwamu. Kandi ebyafaayo eby'eganda ibiri ezi amaziina gaazo gaihvirwemu ahabw'okuramya ebishushani nibishangwa omu I Abagabe 12:25-30, “Bwanyima Yeroboamu yaayombeka Shekemu omu nsi y'ebibungo bya Efuraimu, yaaturayo; ku haahingwireho ebiro, yaafurukayo, yaazingura Penueli. Bwanyima Yeroboamu yaagira omu mutima gwe ati: Nimmanya ngu hati obugabe nibwija kugaruka omu nju ya Daudi; abantu aba ku baraagume nibainamuka Yerusaalemu kutambirayo ebitambo omu nju ya MUKAMA, emitima yaabo eryagarukira mukama waabo, Rehoboamu omugabe wa Yuda, baanyite, bagarukire Rehoboamu omugabe wa Yuda. Atyo omugabe yaagira enaama y'okukora ebishushani bibiri by'enyana omu zaabu. Yaagira abantu ati: Nikiija kubarusya okuguma nimwinamuka Yerusaalemu. Imwe Baisraeli 'mwe, nimureebe baaruhanga baanyu abaabaihire omu nsi ya Misri. Ekimwe yaakita omuri Beseeli n'ekindi yaakita Daani. Ekyo eki yaakozire kyaba ekibi; ahakuba abantu bakaba baza kuramya eky'omuri Beseeri, n'ekindi bakishanga omuri Daani.” Hosea 4:17, “Efuraimu ayehongyere ebishushani ebirikuramibwa; mumurugyeho.”

Yetegereze okukira munonga ku ekifubiro ky'okuramya ebishushani kyabaire kiri eiziina ry'orwo ruganda kwihwamu "rikeeba ahansi y'eiguru." Eky'Ebiragiyo 29:20. Tikirikugamba ngu riryaihwa "omu iguru" kureka ahansi y'eiguru. Kandi omu mazima nikwo kiri, ahakuba hati Abaisraeli bagarukire omuri Palesitaini, kandi omu bwire bwa haihi Mukama naija kuta akamanyiso ahari 144,000 aharibo. Kwonka okuruga omuri ogwo mubaro Daani na Efuraimu tibarimu.

Okushuuruurwa 7:4-8, "Naahurira omubaro gw'abaatairweho akamanyiso, ogwabaire guri akasiriira n'obukumi buna n'enkumi ina, abaarugire omu nganda ZOONA ez'abaana ba Israeli; ab'omu ruganda rwa Yuda abaatairweho akamanyiso bakaba bari kakumi n'enkumi ibiri, ab'omu ruganda rwa Reubeeni kakumi n'enkumi ibiri, ab'omu ruganda rwa Gaadi kakumi n'enkumi ibiri, ab'omu ruganda rwa Asheeri kakumi n'enkumi ibiri, ab'omu ruganda rwa Nafutaali kakumi n'enkumi ibiri, ab'omu ruganda rwa Manaase kakumi n'enkumi ibiri, ab'omu ruganda rwa Simeoni kakumi n'enkumi ibiri, ab'omu ruganda rwa Leevi kakumi n'enkumi ibiri, ab'omu ruganda rwa Isakaari kakumi n'enkumi ibiri, ab'omu ruganda rwa Zebuluuni kakumi n'enkumi ibiri, ab'omu ruganda rwa Yosefu kakumi n'enkumi ibiri, n'ab'omu ruganda rwa Benyamini abaatairweho akamanyiso nabo kakumi n'enkumi ibiri." (Yetegereze, Daani na Efuraimu tizirimu). Hati okwongyera ahari eki, reeba Danieli 12.1, egyo erikugamba ahari aba emitwara ikumi na ina n'enkumi ina nibateebwaho akamanyiso omu kamanyiso ka mukaaga hamwe n'omu bwire bw'Okubonabona Kwingi nari ebiro by'enaku za Yakobo. "Omu bunaku obwo Mikaeli, omukuru rugambwa oreberera abantu baawe, aryaimuka, habeho obunaku bw'obusaasi obutakabahoga, okwiha obu eihanga ryabaho okuhitsya obwo; kwonka omuri obwo bunaku abantu baawe baryajunwa, weena OU EIZIINA RYE RIRISHANGWA RIHANDIIRWE OMU KITABO."

N'obu kiraabe, ahanyima y'obwire obu bw'okubonabona, (omu kutegyeka kwa Kristo kw'emyaka Rukumi,) nk'oku Ezekieli yaareebire omu shuura ya 48:1-8, na 22-29 nitureeba enganda zigarukire ogundi murundi omu buteeka bwa Ruhanga. Kwonka, okuruga omu bwire obu Efuraimu na Daani baayeteerana n'ebishushani ebirikuramibwa, bakafa kandi ezo nganda tizikimanywa na kakye. Hati niinyetegereze ngu okuruga obu Yerusalemu yaasheenayagurwa, ebihandiko byona by'enganda zoonza bikabura, n'ahabw'ekyo tihaine n'omwe orikumanya omu mazima oruganda oru arikurugamu, KWONKA RUHANGA NAAMANYA. Ogwo Ruhanga mukuru Orikugarura Abaisraeli omuri Palesitaini naamanyira kimwe oruganda oru buri Mwisraeli w'amazima arikurugamu, kandi okuruga omuri abo boona abeteeraine emitwara ikumi na ina n'enkumi ina oruganda rwa Daani na Efuraimu nizijira kuba zitarimu.

Ezi nizo nganda za Israeli. Ezekieli 48:1-8 na 22-29, "Aga nigo maziina g'enganda. Okutandikira aha mwatano gw'aha bukiizi-bwa-bumoso, okuruga aha Nyanja empango, okuraba Heseloni, okuhika ah'orikutaahira nooza Hamasi, n'okugumizamu okuhika Hazarenooni eri aha mwatano gwa Damasiko ahashungaine na Hamasi, okuruga aha rubaju rw'oburugwa-izooba okuhika oburengyerwa-izooba, guryaba omugabo gwa Daani. Ahaheeraine n'ekyanga kya Daani, okuruga oburugwa-izooba okuhika oburengyerwa-izooba, guryaba omugabo gwa Ashera. Ahaheeraine n'ekyanga kya Ashera, okuruga oburugwa-izooba okuhika oburengyerwa-izooba guryaba omugabo gwa Nafutaali. Ahaheeraine n'ekyanga kya Nafutaali, okuruga oburugwa-izooba okuhika oburengyerwa-izooba guryaba omugabo gwa Manaase. Ahaheeraine n'ekyanga kya Manaase, okuruga oburugwa-izooba okuhika oburengyerwa-izooba, guryaba omugabo gwa Efuraimu. Ahaheeraine n'ekyanga kya Efuraimu, okuruga oburugwa-izooba okuhika oburengyerwa-izooba guryaba omugabo gwa Reubeeni. Ahaheeraine n'ekyanga kya Reubeeni, okuruga oburugwa-izooba okuhika oburengyerwa-izooba, guryaba omugabo gwa Yuda. Ahaheeraine n'ekyanga kya Yuda, okuruga oburugwa-izooba okuhika oburengyerwa-izooba, . . ." n'ebindi. "(Kandi okuruga omu mwanya gw'Abaleevi,) hamwe n'omwanya gw'orurembo, guryaba ahagati y'ekyanga ky'omugabe. Ekyo kyangira kirya ahagati y'omugabo gwa Yuda n'ogwa Benyamiini (kibe eky'OMUGABE). Kandi eby'ezindi nganda, okuruga oburugwa-izooba okuhika oburengyerwa-izooba, guryaba omugabo gwa Benyamiini. Ahaheeraine n'ekyanga kya Benyamiini okuruga oburugwa-izooba okuhika oburengyerwa-izooba guryaba omugabo gwa Simeoni. Ahaheeraine n'ekyanga kya Simeoni, okuruga oburugwa-izooba okuhika oburengyerwa-izooba, guryaba omugabo gwa Isakaari. Ahaheeraine n'ekyanga kya Isakaari, okuruga oburugwa-izooba okuhika oburengyerwa-izooba, guryaba ekyanga kya Zebuluuni. Ahaheeraine n'ekyanga kya Zebuluuni, okuruga aha burugwa-izooba okuhika oburengyerwa-izooba, guryaba omugabo gwa Gaadi. Ahaheeraine n'ekyanga kya Gaadi aha rubaju rw'obukiizi-bwa-buryo, . . ." n'ebindi.

Eky'okureeberaho ekindi eki turikubaasa kutwara n'ebyaafaayo by'Abaisraeli barikuruga Misri nibaza omu nsi ya Kanaani. Ekigyendererwa kya Ruhanga omu busingye obu kikaba kiri OKWIHAYO Abasraeli, n'OKUBATAASYAMU, kugira ngu bakaabaasa Kumuheereza. N'ahabw'ekyo obu baaruga Misri BOONA bakarugayo bari ahansi y'eshagama y'ekitambo ky'omwana gw'entaama; BOONA bakaraba kandi babatizibwa omu maizi omu Nyanja Erikutukura; BOONA bakashemererwa eby'amahano bikuru; BOONA bakarya emaanu; BOONA bakanywa aha Rukiri orwo; kandi aha bikwatiraine n'emigisha erikureebeka kandi n'okweyoreka kw'Omwoyo BOONA bakakwatanisa omu muringo ogurikushushana kandi ogurikwingana. Kwonka, ku baahikire Moabu boona abaakwataniise omu bugyenye bwa Baali-Peori bakafa. Emitumbi yaabo ekagwa omu ihamba, ahakuba okwo niyo baagomeire Ekigambo kya Ruhanga kandi baakirugaho. Hati eki nikyo Abaheburaayo 6:1-9 erikugambaho, ekyashoboroirwe kurungi omu Busingye bwa Perugamo. Torikubaasa kugyenda n'ekicweka ky'Ekigambo kyonka, nooragiirwa kutwara Ekigambo KYONA. Hariho abantu abarikureebeka nk'abarikukora emirimo ya Ruhanga haihi obucweka igana ahari igana. Bari nka Yuda. Tihariho n'omwe owaabaire naamanya eki Yuda yaabaire ari omu bwijwire kureka Yesu. N'ahabw'ekyo ekiro kikahika Yuda yaakora ebirikushushanira kimwe n'ebi Abaisraeli

baakozire ahari Baali-Peori. Bakacwamu kwenda kukwatanisa n'ekiibina ky'omuzaazibu ogw'ebishuba - kuza omu by'obushuubuzi, ekibiina ky'eb'obutegeyeki ekirikuhakanisa Ekigambo, ediini ya Antikristo kandi akakikora. Akabeihwabeihwa! Abandi ikumi n'omwe tibarabeihabeihirwe. Bakaba batarikubaasa kubeihwabeihwa, ahakuba bakaba bari entoore kashushu. N'ahabw'ekyo Yuda ku yaagyenzire kandi yaarebya Mukama, eiziina rye rikaihwa omu Kitabo ky'Amagara. (Okushuuruurwa 22:19).

Hati nimpamya ngu waayetegyereza ku abo abu amaziina gaabo gaabaire gari omu Kitabo ky'Amagara baabaire nibakwatanisa n'entwaza y'ediini y'ebiro ebyo eyaabaire eyegamiire ahari Ruhanga ow'amazima kandi n'Okumuramya, n'obu baraabe batararamiize omu Mazima (Ekigambo). Nka Yuda tibaragumiizemu okuhitsya aha muheru. Yetegyereze ku Yuda yaabaire atoorainwe Ruhanga. Akegyesibwa amazima. Yaabagana aha kumanya enaama. Akaba aine obuheereza oburimu amaani obwamuhairwe kandi akakiza abarwaire yaabinga na baadaimoni omu Iziina rya Yesu. Kwonka obwire bw'okweyoreka eki ari ku bwahikire, akatooranamu ezaabu n'obushoboorozi bw'eb'obutegeyeki. Taragumiizemu kuhika ahari Pentekoote kutunga Omwoyo wa Ruhanga. Akaba ataine Mwoyo omuriwe. Otakaakibanganisaho, omuntu obatiziibwe n'Omwoyo Orikwera omu mazima kutaaha omu mubiri gwa Kristo akajura Omwoyo naija kuguma omu KIGAMBO OBWIRE BWONA. Ako niko kamanyiso k'okubatizibwa n'Omwoyo Orikwera. Yuda akaremwa. Abantu baingi aho niho baremerwa. Kandi ku baremwa kugumizamu omu Kigambo ekyo, amaziina gaabo gaihwa omu Kitabo ky'Amagara.

Okugira ngu tweyongyereyo kushoboorora aha ky'eiziina kwihwa omu Kitabo ky'Amagara tushemereire kugarura enyima ebiteekateeko byaitu aha Baisraeli omu biro bya Musa. Okuruga 32:30-34, "Ku bwaseesire, Musa yaagambira abantu ati: Mukozire ekibi kihango; mbwenu naaza kwinamuka ahari MUKAMA; obundi nkaabaasa kukora eky'okurihiirira ekibi kyanyu. Musa yaagaruka ahari MUKAMA, yaagira ati: Ai bambe, abantu aba bakozire ekibi kihango, baayekorera ruhanga omu zaabu. Mbwenu hati, ku oraabe noikiriza kubasaasira ekibi kyabo, obasaasire; kwonka ku oraabe otarikubasaasira, naakweshengyereza onyihe omu Kitabo eki Waahandiikire. MUKAMA yaagarukamu Musa ati: Weena oncumwireho, niwe Ndaihe omu kitabo Kyangye. Mbwenu irooko otware abantu abo omu mwanya ugu naakugambiire; reeba, maraika Wangye naija kukwebembera. Kwonka aha izooba ry'okuhoora, Ndyabatura ekibi kyabo." Nikyeyorekyera kimwe ku amaziina garahirwe, kandi ku nigaija kwihwa omu Kitabo ky'Amagara tutakataahire omu butahwaho. Omuri ugu mwanya ogwagambwaho kikareetwa okuramya ebishushani, nk'obu Daani na Efuraimu baafeerwa obugabe bwabo nk'enganda ahabw'okuramya enyana z'ezaabu. Boona abaaramize ebishushani amaziina gaabo gakaihwa omu Kitabo ky'Amagara.

Abaisraeli ku baayangire obwebembezi bwa Ruhanga omu nyomyo y'omuriro, kandi bakahindikira okuramya enyana z'ezaabu amaziina gaabo gakaihwa omu Kitabo ky'Amagara. Okuruga 32:33 "Weena oncumwireho niwe Ndaihe omu Kitabo Kyangye." Okuhindikira ebishushani ebirikuramibwa ku kuraabe kushemereire ekifubiro eky'amaziina kwihwa omu Kitabo ky'Amagara, n'ahabw'ekyo Abaisraeli kwanga Yesu Kristo nka Mesia kishemereire ekifubiro nk'ekyo. Omu bwijwire eki nikwo kiri. Omuri Zaaburi 69 ahu erikworeka okuhemurwa kwa Yesu nihagamba omu mishororongo 21-28 hati, "Bampa ebirikushaarira kubirya; n'ahabw'eiriho Bampa viinyo erikushaarira kuginywa. Emeeza yaabo ebabeere omutege, n'okugira obusingye kubabere urugogo. Amaisho gaabo gashwekwe oruho, barekye kureeba, otetemye enyugunyuru zaabo obutoosha. Obashukyehe okuguubwa kubi Kwawe, kandi ekiniga Kyawe kingi kibahikyeho; eka yaabo ehindukye eitongo; hatagira owaatuura omu mahema gaabo. Ahakuba nibahiiga Ou Waateire, nibagambirana eby'obusaasi bw'ogwo ou Waahutaize. Oyongyere ebiheneso aha biheneso byabo, hatagira owaasinga orubanja omu maisho Gaawe. Amaziina gaabo gaihwe omu Kitabo ky'Amagara; barekye kuhandiikwa n'abahikiriire." Abayudaaya ku baayangire Yesu Ruhanga akabarugiraho kimwe yaaza aha Banyamahanga. Ebyakozirwe 13:46-48, "Paulo na Barunaba baagamba n'obumanzi, bati: Kikaba kishemereire kuba niimwe mwabanza kugambirwa Ekigambo kya Ruhanga; mbwenu obu mwakyangwa, mukeeyoreka ku mutashemereire magara agatahwaho, reeba twahindikira Abanyamahanga. Ahakuba Mukama waitu nikwo yaaturagiire ati: Nkutaireho kuba omushana gw'Abanyamahanga ngu otware okujunwa, okuhitsya aha muheru gw'ensi. Abanyamahanga ku baakihuriire, baashemererwa, baahimbisa Ekigambo kya Ruhanga; boona abatooraniirwe amagara agatahwaho baikiriza."

Oku ti kugira ngu tiharibaho maziina agandi omu nganda z'Abaisraeli agariguma omu Kitabo ky'Amagara, ahabw'okuba baingi omuri aba (kwonka gutari mutwe muhango gw'abantu) kurabira omu kiragiro ky'okutoorana nibaija kuba omu busingye bw'ekanisa y'Abanyamahanga kandi baije omu mubiri gwa Yesu Kristo, ekirikworeka ku amaziina gaabo buzima gaagumire omu Kitabo ky'Amagara. Kandi nabwo, nk'oku turaaboorekye, okurugiirira aha kamanyiso ka kataano Abayudaaya baingi abaitsirwe, Mukama naija kubaha ebijwaro ebirikwera n'amagara agatahwaho. Kandi n'abo emitwaro ikumi na ina n'enkumi ina nibaija kuteebwaho akamanyiso aha kwija Kwe, ekirikuhama ku amaziina gaabo nabo gatarahirwemu. Kwonka nikyorekwa kurungi munonga omuri Zaaburi 69 ku n'ababi nari abatahikiriire abaayangire Kristo kandi n'abo abarikuhwerekyereza abantu Be abu amaziina gaabo garyaihwa.

Nk'oku Abaisraeli (abantu ba Ruhanga abatoorainwe) abarikukira obwingi baafereirwe obugabe bwabo omu Kitabo ky'Amagara ahabw'okwanga Yesu, nikwo n'amakanisa agarikukira obwingi g'Abanyamahanga nago garikwija kuza omu kucwerwa orubanja ekiraarugyemu amaziina gaabo gaihwe omu Kitabo ky'Amagara ahabw'okwanga Ekigambo reero baze omu nkora erikushagika okwegaita kw'amakanisa g'Abakristaayo g'omu nsi yoona niko kishushani ekikoreirwe enyamaishwa.



Hariho ekindi kintu eky'okureeba hanu. Omu Kitebe ky'Obukama kihango Ekirikwera eky'okucweraho emanja haryabaho okushorooro omu bantu. Ekitabo ky'Amagara kiryashuuruurwa kandi n'ekindi kitabo kiryashuuruurwa. Matayo 25:31-46, "Omwana w'Omuntu ku ariizira omu kitiinisa Kye hamwe na baamaraika Be boona, Aryashutama aha kitebe Kye eky'ekitiinisa, amahanga goona gateeranirwe omu maisho Ge; kandi Aryagashorooro, nk'oku omuriisa ashorooro entaama omu mbuzi. Entaama Aryazita aha rubaju Rwe rwa buryo, kwonka embuzi Aryazita aha rwa bumoshu. Obwo Mukama Aryagira ab'aha rubaju rwa buryo ati: Mwije, imwe abu Tata yaahaire omugisha, muhungure obukama obwabateekateekyeirwe okuruga aha kuhanwa kw'ensi; ahakuba Nkaba nyine einjara, Mwampa eby'okurya; Nkaba nyine eiriho, Mwampa eky'okunywa; Nkaba ndi omugyenyi, Mwankunira; Nkaba jwaire busha, Mwanjweka; Nkaba ndwaire, mwaija Kundeeba; Nkaba ndi omu kihome, Mwantaayaayira. Abahikiriire Baryamubuuza bati: Mukama waitu, tukakureeba ryari oine enjara, tukakuha eby'okurya nari oine eiriho tukakuha eky'okunywa? Tukakureeba ryari ori omugyenyi tukakukunira, nari ojwaire busha tukakujweka? Tukakureeba ryari orwaire, nari ori omu kihome tukaija kukureeba? Mukama aryabagarukamu ati: Buzimazima nimbagambara nti: Nk'oku mwabikoreire omwe ahari Beene Tata abo abato okukira abandi, biri Niinye mwabikoreire. Bwanyima Aryagira ab'aha rubaju rwa bumoshu ati: Mundugyehe, imwe abakyeenirwe, muze omu muriro ogutaraara, ogwateekateekyeirwe sitaane na baamaraika be; ahakuba Nkaba nyine enjara, Timwampa by'okurya; Nyine eiriho, Timwampa ky'okunywa; Nkaba ndi omugyenyi, Timwankunira; Njwaire busha, Timwanjweka; Ndwaire kandi Ndi omu kihome, timwaija Kundeeba. Nabo Baryamugarukamu bati: Mukama waitu, tukakureeba ryari oine enjara, nari oine eiriho, nari ori omugyenyi, nari ojwaire busha, nari orwaire, nari ori omu kihome, tukabura eki Twakukorera? Nawe aryabagarukamu ati: Buzimazima Nimbagambara nti: Nk'oku mutarabikoreire omwe ahari abo abato okukira abandi, biri Naanye timurabikoreire. Abo byaryaza omu kubonabonesibwa okw'ebiro n'ebiro, kwonka abahikiriire bo byaryataaha omu magara agatahwaho."

Okushuuruurwa 20:11-15, "Bwanyima naareeba ekitebe ky'obukama kihango ekirikwera n'Ogwo Owaabaire akishutamiho; ensi n'eiguru byahunga nibiruga omu maisho Ge; byabura obuhamizo. Naareeba abafu, abakuru n'abato, beemereire omu maisho (ga Ruhanga), ebitabo byashuuruurwa. N'ekitabo ekindi kyashuuruurwa, nikyo eky'amagara. Abafu baacwerwa emanja z'ebyahandiikirwe omu bitabo nk'ebi baakozire oku biri. Enyanja yaagarura abafu abaabaire bagirimu, na rufu n'okuzimu byagarura abafu abaabaire bariyo; boona baacwerwa emanja z'ebi baakozire. Rufu n'okuzimu byanagwa omu nyanja y'omuriro. Egyo nyanja y'omuriro nikwo kufa okwa kabiri. Kandi omuntu weena, ou eiziina rye ryabaire ritahandiikirwe mu Kitabo ky'Amagara, yaanagwa omu nyanja y'omuriro." Nihaija kubamu abahikiriire n'abatahikiriire omu kucwerwa orubanja oku. Nikwo kirikugira. ABAHIKIRIIRE ABA TIBARIBA OMUGORE AHABW'OKUBA OMUGORE ARYABA ASHUTAMI NAWA OMU KUCWA ORUBANJA. I Abakorinso 6:2-3, "Timurikumanya ngu abarikwera nibo baricwera ensi orubanja? Kandi ku muraabe niimwe muricwera ensi orubanja, timurikubaasa kucwa emanja nkye nk'ezo? Timurikumanya ku turicwera baamaraika emanja? Reero kaashwa eby'amagara aga?" Okushuuruurwa 3:21, "Orikusingura, Ndyamwikiriza kushutama aha kitebe Kyangye ky'obukama, Nkaanye oku Naasingwire, nkashutama hamwe na Tata aha kitebe ky'obukama Bwe." Reeba, omugore ari Nawe aha kitebe ky'obukama. Obu omugore arikwija kucwera ensi orubanja naija kushutama Nawe omu kucwa orubanja. Ekyo nikyo Danieli yaareebire buzima. Danieli 7:9-10, "Ku naabaire ninkyetegyereza, naareeba ebitebe by'obukama byateebwaho, Omukuru owa iranaira yaashutama; ebijwaro Bye bikaba nibyera nk'orubaare, kandi eishokye Rye niryerera kimwe nk'ebyoza by'entaama; ekitebe ky'obukama Bwe kiri endimi z'omuriro, kandi n'enziga zaakyo ziri omuriro ogurikwaka. Omu maisho Ge haarugamu omugyera gw'omuriro, rukumi emirundi enkumi Baamuheereza, na kakumi emirundi obukumi baayemerera omu maisho Ge. Emanja zaatandika kuhurirwa, ebitabo byashuuruurwa." Reeba, n'ekintu kimwe, ahakuba rukumi emirundi enkumi Abarikumuheereza n'omugore, mbwenu n'oha oheereza iba atari mukazi we?

Ekibuuzo hati nikijja, ababw'enki abahikiriire aba bari omu orubanja? Tihariho ogundi mwanya gwona ogu barikubaasa kureebekyeramu, ahakuba hariho okuzooka kw'emirundi ebiri yonka kandi ku baraabe batarabaasize kuba omu kuzooka kw'okubanza nibateekwa kwija omu kwa kabiri nikwo okuzooka kw'okucwerwa orubanja. Abo abahikire kuza omu kuzooka kw'okubanza (omugore) tibari omu rubanja. Yohaana 5:24, "Buzimazima Nimbagambara nti: Orikuhurira Ekigambo Kyangye, akaikiza Owantumire, aine amagara agatahwaho," (nikimanyisa ngu, omwikiriza yaaherize kutunga amagara agatahwaho agu aine hati) "kandi tariza mu rubanja;" (tariza omu kucwerwa orubanja buzima nikyo kirikumanyisa) "ahabw'okuba aherize kuruga (obutwire bwona) "omu kufa, yaataaha omu magara." Kwonka yetegyereze n'okwegyendesereza, Yesu naateekwa kuba aine ekibiina ekindi omu biteekateeko abaritunga amagara agatahwaho aha kuzooka okundi. Nibaija kugaheebwa aha kuzooka, OBWO ENYIMAHO BAABAIRE BATAGAHAIRWE NK'EKICWEKA KY'OMUGORE. Yohaana 5:28-29, "Mutatangaarira eki; ahakuba obunaku nibwija, abari omu bituuro BOONA obu barihurira eiraka Rye, bakarugamu, abo abaakozire gye, bakazookyera amagara; n'abo abaakozire kubi, bakazookyera okucwerwa orubanja." Hati twena nitumanya ku Yohaana 5:28-29 KUTARI OKUTWARWA ababw'okuba abaafereire omuri Kristo bonka nibo barizooka okuruga omu bituuro omu bwire obwo hamwe n'omugore oriho ohuriire okiri omu nsi. I Abatesalonika 4:16-17, "Ahakuba Mukama aryayeimukira ashuume naaruga omu iguru agambe munonga n'eiraka rya maraika omukuru n'enzamba ya Ruhanga; kandi abaafereire omuri Kristo nibo baribanza kuzooka; bwanyima naitwe abahuriire abariba bakiriho turyatwarwa nabo omu bicu kubugana Mukama waitu omu kaabunga; tutyo tugume na Mukama ebiro byona." Kwonka nikigamba omuri Yohaana 5:28-29 ku BOONA barikuza kuruga omu bituuro. Oku nikwo kuzooka okwo okurikugambwaho omu Kushuuruurwa 20:11-15 ahu

ABAFU baareetsirwe omu maisho ga Mukama kandi bakacwerwa orubanja okurugiirira aha mirimo yaabo, kandi boona abu amaziina gaabo gaabaire gatari omu Kitabo ky'Amagara bakanagwa omu nyanja y'omuriro.

Hati twabugana ekibuuzo ahabw'enki bashemereire kuheebwa amagara agatahwaho aha izooba ry'okucwerwa orubanja kandi Amabaraha g'Entumwa gaashusha nk'agarikworekyera kimwe bwahwayo ku omuntu arikuteekwa kuba aine Omwoyo wa Kristo kitari kityo ahwerekere. N'obu kiraabe nikyenda kushusha kityo, titushemereire kuhindura busha ebigambo bya Yesu Owaakyorekyeire kimwe ku hariho bamwe abarikushangwa omu Kitabo ky'Amagara abarikwija kuheebwa amagara agatahwaho okuzooka kwa boona kutakabaireho nari ahanyima yaakwo. Paulo tarikwehuzya amazima aga ahakuba naagamba bwerure omu Bafilipi 3:11 ati, "Naanye, ku kiribaasika, mbone kuhika aha kuzooka omu bafu." Hati ebigambo ebi n'eby'omutaano munonga. Twena nitumanya ngu TWENA nitwija kuba turi omu kuzooka twaba nitwenda nari tutarikwenda. Boona baryazoorwa. N'ahabw'ekyo Paulo takaabaire naagira ati, "Naanye KU KIRIBAASIKA, mbone kuhika aha kuzooka omu bafu." Hati amazima ag'eki gari ngu, tikyo arikugamba. Enshoma ehikire ni, "Naanye ku kiribaasika mbone kuhika aha 'kuzooka okw'aheeru' kuruga omu bafu." Oku ti kuhika aha kuzooka kwa boona nari okuzooka kwa kabiri, kureka okuhika aha kuzooka kw'okubanza, okurikugambwaho kuti, "Omuntu owaatungire omugabo omu kuzooka okwo okw'okubanza aine omugisha kandi n'orikwera. Abari nk'ogwo okufa kwa kabiri tikubaineho bushoboorozi; kureka baryaba abanyamurwa ba Ruhanga na Kristo, bategyeke Nawe okumara emyaka rukumi." Okuzooka kw'okubanza tikwine kakwate n'okufa kwa kabiri. Ekyo kiryabaho ahanyima y'emyaka rukumi obu abafu ABANDI BOONA ABATSIGAIREHO barigaruka kuba abahuriire. Kandi aha kiro ekyo haryabaho abo abarizookyera amagara agatahwaho hamwe n'abo abandi abariza omu kufa kwa kabiri. Hati titurikwetenga kuteebereza abo abu omu kuzooka kwa kabiri bariheebwa amagara. Nitugambirwa ku nibagaheebwa ahabw'okuba abanyambabazi kandi barungi aha "B'eishe-emwe." Abo abarizoorwa kandi bakanagwa omu nyanja y'omuriro baryatwazibwa batyo ahabw'okutwaza kubi "Ab'eishe-emwe." Obu eki kiri Ekigambo kya Ruhanga nikwo turaakitware tutyo. Tihariho okuteera empaka hantu, n'ekigambo ky'amazima ekyanguhi.

Okwongyera kushoboorora, yetegereze kurungi ebigambo eby'omuri Matayo 25:31-46. Tikirikugamba ngu omuriisa naashoorora entaama omu mbuzi, kiri NK'OKU omuriisa ataanuura entaama omu mbuzi. Aba tibari ntaama omu bwire obu (Ekitebe ky'Obukama Ekirikwera eky'Okucweraho Emanja). Entaama ziri omu itsibikiro Rye, zikahurira eiraka Rye (Ekigambo) kandi Zaamukuratira. BAKAHEZA KUTUNGA AMAGARA AGATAHWAO KANDI TIBARIKUBAASA KUZA OMU KUCWERWA ORUBANJA. Kwonka aba TIBAINA amagara agatahwaho, kandi bari omu rubanja. Nibaikirizibwa KUTAAHA OMU magara agatahwaho. Kwonka ni nshonga ki erikutuma baataaha omu magara agatahwaho? Buzima tikugira ngu n'ahabw'okuba baaherize kutunga amagara Ge nk'oku omugore againe, kureka nibagaheebwa ahabw'okuba bakagirira embabazi Beene-ishe ba Kristo. Tibari Beene-ishe: ekyo kikabahindwire abahunguzi na Yesu. TI bahunguzi aha kintu kyona kureka amagara gonka. Tihaine ekitebe ky'obukama eki barikubagana, n'ebindi, hamwe Nawe. AMAZIINA GAABO NIGATEEKWA KUBA GAABAIRE GARI OMU KITABO KY'AMAGARA KANDI TIGARAIHIRWEMU. Hati ahabw'okukunda abantu ba Ruhanga nibasiimwa kandi bajunwa. Tihariho kubanganisa aba bakaheereza kandi baahwera abaana ba Ruhanga. Shana nka Nikodemu na Gamalieli bakarwanirira abaana ba Ruhanga omu bwire bw'akabi.

Eki ku kiraabe nikireebeka nk'ekirikwenda kushushana "n'okugarura busya," yetegereze kurungi hati, ahakuba ababi TIBAKAAGARURWA busya, kureka nibanagwa omu nyanja y'omuriro. Amaziina ga baingi abo abahwerekereziibwe nago gakaba gari omu Kitabo ky'Amagara; kwonka gakaihwamu ahabw'okuba bakaremwa kuha ekitiinisa abantu ba Ruhanga abaabaire bari Ekigambo kya Ruhanga ekihuriire ekyorekirwe (ebaruha z'engiri ezihuriire) omu biro byabo.

Hati reka twetegereze kurungi hantu. Aga tigari mahanga agarikucwerwa orubanja kandi agarikuza omu kutegyeka kwa Kristo kw'emyaka rukumi ahabw'okuba gakashereka kandi gaahwera Abayudaaya. Ekyo kishoboorokire gye ahabw'okuhendera kw'emishororongo egi "Abo (ababi) baryaza omu kubonabonesibwa okw'ebiro n'ebiro (enyanja y'omuriro), kwonka abahikiriire bo baryataaha omu magara agatahwaho." Tihariho byahandiikirwe ebirikugamba aha kucwa emanja KABIRI okutairweho ahu ababi barinagwa omu nyanja y'omuriro. Enyamaishwa yonka na nabi w'ebishuba nibo baricwerwa orubanja aha muheru gw'okubonabona kwingi. Ngaaha, eki n'Ekitebe ky'obukama Ekirikwera eky'okucweraho emanja, kandi nibacwerwa emanja okurugiirira omu bihandikirwe omu bitabo.

N'omu kuzooka kwa kabiri ahu "emyoyo eri ahansi y'eitambiro" nk'oku kirikwerekwa omu kamanyiso ka kataano (Okushuuruurwa 6:9-11) erikuheebwa ebijwaro ebirikwera n'amagara agatahwaho, kitari kityo tihakubaireho omugasho gw'ebijwaro ebirikwera. "Ku Yaabambwire akamanyiso ka kataano, naareeba ahansi y'eitambiro emyoyo y'abatsirwe ahabw'Ekigambo kya Ruhanga n'ahabw'obujurizi obu baahaire; baataka n'eiraka rihango, nibagira bati: Ai bambe, Mukama waitu orikwera kandi ow'amazima, oryahitsya hi okutacwera rubanja abatuura omu nsi n'okubahooru enzigu aha bw'eshagama yaitu? Bwanyima buri omwe yaaheebwa ekijwaro ekirikwera, kandi baaragiirwa kumara ogundi mwanya mukye bahuumwire, okuhitsya omuhendo gw'abaheereza bagyenzi baabo na beene waabo, abarikwija kwitwa nkabo, obu gurihika." Hati yetegereze okukira munonga ku hatariho n'omwe omuri aba abari ahansi y'eitambiro owaitsirwe ahabw'obujurizi obu yaaheereire Yesu. Bakaba batari nka Antipa owaitsirwe ahabw'okugumiza kimwe Eiziina rya Yesu. Aba ti bantu abazairwe obwa kabiri, baine amagara agatahwaho nk'obuhunguzi bwabo. Nibareebeka omu kuzooka kandi baheebwa amagara ahabw'okwemerera kwabo aha Kigambo. Kandi yetegereze oku aba barikutaka kugira ngu bahoorerwe enzigu.

Tibabaasa kuba omugore. Omugore ahindura omushaya kandi agamba munonga ati, “Taata, basaasire, ahakuba tibarikumanya eki barikukora.” Aba n'Abayudaaya. Nibateekwa kuba baribo ahabw'okuba bari omu kamanyiso ka kataano, kandi n'omu kamanyiso ka kana omu omugore Omunyamahanga arikutwarirwa. N'ahabw'ekyo Abayudaaya aba tibazairwe Omwoyo We. Nangwa tibarikwikiriza ku Yesu ari Mesia. Kwonka nk'oku baahumiibwe Ruhanga ahabw'Abanyamahanga, Ruhanga akabaha amagara agatahwaho ahabw'enshonga ngu n'obu baraabe Bataramwizireho, kwonka nabwo buzima bakaba bari abeesigwa aha Kigambo kyona eki baamanyire, kandi baakifeera nka baingi abaafiire omu bwire bwa Hitler, Stalin, n'abandi, kandi nibaija kugaruka kufa.

N'omu kuzooka kwa kabiri omu abaishiki abashugaine bataano abashema barireebekyera. Yetegyereze ku n'abaishiki abashugaine. Bakaba bataine Omwoyo Orikwera n'ahabw'ekyo bakafeerwa kuba omu mugore, kunu abataano ab'obwengye abaabaire baine amajuta baabaire ekicweka ky'ogwo mugore. Kwonka abantu aba, ahabw'okuba abashorirwe, abantu abarikukunda Ruhanga, kandi nibageyeho kuguma omu Kigambo, okurugiirira aha ki baabaire nibakimanyaho, kandi ahabw'okuhwera omu murimo gwa Mukama, nibaija kureebeka aha bwire bw'aha muheru. Nibaija kufeerwa kuza omu kutegyeka kwa Kristo kw'emyaka rukumi, ei orikutandika kureeba ahabw'amazima aga ku ni kukuru munonga kandi okw'okutangaaza okukira oku turakuteekateekireho nari okukwikiriza.

Abantu aba boona bakaba baine amaziina gaabo omu Kitabo ky'Amagara kandi amaziina gaabo gaagumamu. Kwonka ni baahi abu amaziina gaabo gataragumiremu? Abo ab'entwaza y'amakanisa g'ensi abaarwaniise omugore nibo abo abu amaziina gaabo garihwamu. Abo nibo barikwija kufeerwa. Baryanagwa omu nyanja y'omuriro.

Hati reka tuteere entambo endiijo, kwonka tutakakikozire reka tugarukye tushwijume enshonga yaitu ahu twagihitsya. Eky'okubanza kya byona nitumanyira kimwe ngu ekigyendererwa kya Ruhanga kiri omu kutoorana. Akakigyenderera We wenka. Kikaba kiri ekigyendererwa kya Ruhanga kuzaara abantu Abarikumushusha abariba Omugore Kigambo. Omugore akatooranirwa OMURIWE ensi etakahangirwe. Omugore akamanywa ira kandi yaakundwa atakareetsirwe omu nsi omu busingye bwona. Akacungurwa n'eshagama ya Kristo kandi TARIKUBAASA kuza omu rubanja. Tarikubaasa kuba omu kucwerwa orubanja ahabw'okuba tarikubarirwa kibi. Abarooma 4:8, “Aine omugisha omuntu ou Mukama ataribarira kibi.” Kwonka buzima omugore aryaba ari na Kristo omu kitebe Kye eky'obukama eky'okucweraho emanja, naacwera ensi emanja nangwa na baamaraika. Eiziina rye (buri memba w'omugore) rikaba rihandiikirwe omu kicweka ky'Ekitabo ky'Amagara eky'Omwana gw'Entaama ensi etakahangirwe. Ekya kabiri, hariho ekibiina ekindi. Amaziina gaabo nago gari omu Kitabo ky'Amagara kandi baryareebeka omu kuzooka kwa kabiri. Abari nk'abo n'abaishiki abashugaine abashema hamwe n'abahikiriire nk'oku bagambirweho omuri Matayo 25. Omu kibiina eki nabwo harimu abo abatarikumushusha enyamaishwa nari shi okukwatanisa omu ntwaza ya antikristo kureka abarikufeera okwikiza kwabo n'obu baraabe batari omu mugore, batarazairwe obwa kabiri. Kwonka baryareebeka omu kuzooka kwa kabiri kandi baze omu magara agatahwaho. Ekya kashatu hariho Abakristaayo abarikuremerwa aha mwatano nk'oku tureebire Abaisraeli nibaruga omuri Misri. Aba amaziina gaabo gakaba gari omu Kitabo ky'Amagara kandi n'emirimo yaabo ehandiikirwe omu bitabo. Aba ku baaremira kworohera Ruhanga kandi bataine Omwoyo, n'obu obumanyiso n'eby'okutangaaza byabaire bibarimu, amaziina gaabo garyaihwaga omu Kitabo ky'Amagara. Omuri eki kibiina haryabamu abari nka Yuda abu n'obu baabaire batainiire kimwe Mwoyo, kwonka n'abanyadiini, baryaba baine okweyoreka kw'ebiconco by'Omwoyo omu magara gaabo, kandi n'obu baabaire bari omu bitabo bakaba batatooranirwe OMURIWE. Abari nka Balamu nabo nibaija kuba omuri ekyo kibiina. Ekya kana kandi eky'aha muheru n'abo abu amaziina gaabo gatahandiikwaga nari gatarihandiikwa omu bitabo. Abari nk'abo nibashangwa omu Kushuuruurwa 13:8 n'Okushuuruurwa 17:8, “Boona abatuura omu nsi baryagirama, abu amaziina gaabo gatahandiikirwe mu Kitabo ky'Amagara eky'Omwana gw'Entaama owaitsirwe okuruga aha kuhangwa kw'ensi.” “Enyamaishwa ei waareeba ekaba eriho, hati teriho, neeyenda kuruga omu kiina ekitaine bugarukiro, eze omu kuhwerekyerera; kandi abatuura omu nsi, abu amaziina gaabo gatahandiikwaga mu Kitabo ky'Amagara okuruga aha kuhangwa kw'ensi, baryatangaara ahabw'okureeba enyamaishwa egyo, ahakuba ekaba eriho, mbwenu teriho, haza kandi neija kubaho.” Yesu akagira ngu ekibiina kimwe kikaba nikiza kwakiira ogwo oryaija omu iziina rye. Ogwo ni antikristo. Kandi okwo nikwo kirikubagambwaho buzima omu Kushuuruurwa 13:8 na 17:8. Aba bakateebwaho Ruhanga kwonka kutari kutooranwa. Kandi omu kibiina eki harimu abari nka Faraho. Nikimugambaho kiti, “Eki naakwemekyeire (n'ahabw'ekigyendererwa eki).” “Enyabya ez'ekiniga ezaateekateekyeirwe okuhwerekyerera.” Abarooma 9:17 na 22. Tihaine n'omwe omuri aba owaakutairwe omu bihandiiko by'amagara. Tindikugira ngu tihaine ahu bahandiikirwe. Tihariho kubanganisa hariho ahu bahandiikirwe, kwonka T'OMU BIHANDIIKO BY'AMAGARA. Ekigyendererwa ky'okubaho kwabo kikwatsirweho kakye ahandi omu kitabo eki kwonka nitubaasa kwongyeraho Ebyahandiikirwe ebindi bibiri. Enfumu 16:4, (“Mukama ababi akabateeraho ekiro ky'enaku.”) Yobu 21:30, (“... omusiisi abiikirwa ekiro ky'okucwerekyerera, baryareetwa aha kiro ky'okugirirwaho ekiniga.”)

Obu ekicweka eki ky'Ekgambo kigumiire obwonko bw'omuntu kukyetegeyereza, nikiteekwa kwakiirwa n'okwikiriza. Bamwe nibaija kugwisibwa kubi n'ebi naayoreka ahabw'okuba nibaremwa kwetegeyereza obukuru bw'okwemariirira kwa RUHANGA oburikworeka ku RUHANGA ARI RUHANGA kandi ahabw'okuba Ari Ruhanga tihaine orikubaasa kusingura enaama Ze nari kuzibira okukunda Kwe hamwe n'ekigyendererwa; kwonka We, ahabw'okuba ow'amaani goona, naategyeka omuri BYONA kandi naakora nk'oku Arikwenda ebihangirwe Bye byona ahabw'okuba byona bikahangirwa Kumushemeza. N'ahabw'ekyo, nk'oku Paulo arikugamba, “Ruhanga ku yaakwiha omu mugoma gumwe ogw'eibumba akabumbamu orwabya rumwe rw'okukoresa eby'ekitiinisa, n'orundi

rw'okukoresa ebirikwitsa enshoni, n'oha owaakuguubwa kubi kandi Akamuhakanisa?" Kugira ngu Aine obushoboorozi bw'okukora eki ahabw'enshonga y'okuhanga yonka, titurikubaasa kukihakanisa. Kwonka nabwo akagumizamu, ahakuba okurugiirira omu Barooma 14:7-9, twine obuhame obutarikubaasa kuhakanisibwa ku Yesu yaashashwire omuhendo gw'okugura ensi yoona, n'ahabw'ekyo Naabaasa kutwaza Abe nk'oku Arikwenda. "Ahakuba omuriitwe tihariho obaho ahabwe wenka, kandi tihariho ofa ahabwe wenka. Ku tubaho, tubaho ahabwa Mukama; kandi ku tufa, tufa ahabwa Mukama; n'ahabw'ekyo, yaaba twabaho, yaaba twafa, turi aba Mukama. Ekyo nikyo Kristo yaafeereire kandi akazooka, ngu abone kuba Mukama w'ABAFIIRE n'ABAHURIIRE." (Okuba mukama w'ekintu; BUTARI buzaare nikyo kirikumanyisa hanu.) Kandi eki nikyorekwa omuri Yohaana 17:2, "Nk'oku Waamuhaire obushoboorozi AHA BANTU BOONA, ngu Abone kuha abu Waamuhaire boona amagara agatahwaho."

Hati, ku turaabe nitubarira Ruhanga okumanya byona, nabwo nituteekwa kwikiriza ku Ahikiriire omu bwengye n'oburikwera. Egi puraani y'okutooranwa hamwe n'okutasiimwa n'obwengye bwa Ruhanga obushuurwirwe omu busingye bwona, nk'oku kirikugambwa omu Abaefeso 1:3-11, "Ruhanga asiimwe, Ishe wa Mukama waitu Yesu Kristo, owaatuhairu emigisha yoona ey'Omwoyo omu myanya y'omu iguru omuri Kristo, nk'oku Yaatutooraniire Omuriwe ahabwa rukundo, ensi etakahangirwe, ngu tube abarikwera abataine kamogo omu maisho Ge. Akatutoorana tutakabaireho, ngu tuhindirwe abaana Be ahabwa Yesu Kristo, nk'oku Yaasiimire omu kukunda Kwe, ngu embabazi Ze ez'ekitiinisa zisiimwe, ezi Yaatuheereire busha omuri Ogwo Ou Akunda. Omuri Ogwo tuheebwa okucungurwa ahabw'eshagama Ye, okusaasirwa eby'okushiisha byaitu, nk'obutungi bw'embabazi Ze oku buri, ezi Yaatusheeshekaizeho. Ahakuba Akatumanyisa enaama y'okukunda Kwe omu BWENGYE bwona n'okwetegyereza kwona, nk'ebi Yaagyendereire kworeka omuri Kristo oku biri, ngu Atebeekanse ebintu, kandi obun

ku ku burihika, Abone kuteeranira atyo byona Omuriwe nk'Omutwe, eby'omu iguru n'ebyo omu nsi. Omuriwe naitwe nimwo twahindukiire obuhunguzi, obu twatooranwa tutakabaireho, ahabw'okukunda kw'Ogwo Ohikiriza byona, nk'oku Yaasiimire omu naama Ye. "N'ahabw'ekyo Ruhanga ku araabe nikwo Yaakikunzire ngu habeho abo abu amaziina gaabo gaahandiikwa omu kicweka ky'Ekitabo ky'Amagara eky'Omwana gw'Entaama kandi tigarikubaasa kwihwamu ahabw'okuba n'amaziina g'omugore We, mbwenu nituteekwa kukiikiriza. Nabwo ku kiraabe nikigamba ngu hariho abo abu amaziina gaabo gaahandiikirwe omu Kitabo ky'Amagara kwonka omu kumanya ira kwa Ruhanga baabaire bari ab'okugwa kandi amaziina gaabo gakaihwamu nituteekwa kukiikiriza. Kandi ku haraabe hariho abo abu amaziina gaabo GATAKHANDIIKWAGA omu Kitabo ky'Amagara, nakyo, nituteekwa kukiikiriza. Kandi ku haraabe hariho abo abaritaaha omu magara agatahwaho bwanyima y'okucwa orubanja okw'aha Kitebe ky'Obukama Ekirikwera ahabw'enshonga yonka ngu bakaba barungi kandi abanyambabazi aha ntoore za Ruhanga kusha nibo beene-ishe ba Kristo, obwo titurikubaasa kukora ekindi kureka ekyo okukiikiriza. MBWENU N'OHA ORIKUMANYA EBI MUKAMA ATEEKATEEKA HAZA AKAIJA KUMWEGYESA? Kureka reka tworobere omu kwikiriza Ogwo ori Tataitwe tube abahuriire.

Okwetegyereza eishomo eri nangwa n'okukiraho nikijja hati kuba eky'obwengye okuritaahamu nitureeba ekanisa omu busingye bwona. Okuhitsya hati tubaire nituteekateekyera omu ky'okwihamu amaziina g'abantu buri muntu okwe. Hati nitwenda kureeba, atari abantu okwabo, kureka ebibiina ebijwekyeirwe omu kanisa. Okukora eki nitwija kushushanisa ekanisa omu busingye bwona nk'ekimera ky'engano. Enjuma y'engano ebyarwa kugira ngu aha muheru enjuma emwe y'engano eije kwezaara kandi ekanye kurabira omu kukura ahanyima y'obwire. Egyo njuma emwe neija kufa, kwonka omu kufa, amagara agabaire gagirimo nigaija kuza omu kimera nakyo ahanyima ekiraije kugira nari kwekorera amagara agashemereire kugaruka kuba enjuma eyaabandize haza ekanyire. Yesu orwo Ruzaaro rukuru ry'Obukama akafa. Ogwo otakainganwa Niwe magara g'ekanisa ayemereire ahagati y'ekanisa ahabw'obusingye mushanju bwona bw'ekanisa naaheereza ekanisa (omwekorezi nari oine) amagara Ge kugira ngu aha muheru amagara Ge gonyini gagarukye gabeho omu mibiri erikushushana n'Ogwe omu kuzooka. N'aha kuzooka obu Oruzaaro rw'Obukama rurireeba oruzaaro rwingi rw'obukama Orurikumushusha, kandi baryaba bari nk'oku Ari, ahakuba Yohaana naagira ati, "Turyashushana Nawe." Eki nikyo Yohaana Omubatizi yaabaire naagambaho obu yaagira ngu Yesu aryahunika engano omu kitara. Okwo kukaba kuri okuzooka ahu abacungwirwe abaabaire batooraniirwe amagara agatahwaho baataahiiremu.

Hati mbwenu, ebirikukwata aha kimera ky'engano eki eki omuheru gwakyo guri okugaruka kuzaara embibo eyaabandize omu muringo ogukanyire n'EKITABO KY'AMAGARA. Ka nkigarukyemu: ebyafaayo nari ebirikukwata aha kimera ky'engano eki n'Ekitabo ky'Amagara kandi ekicweka ky'Ekitabo ky'Amagara n'EKIHANDIIKO KY'AMAGARA AGATAHWAHO. (Ekicweka ky'Ekitabo ky'Amagara). Eki nikyetyegyezibwa gye waashwijuma ekimera ky'engano. Embibo nebibwa. Ahonaaho eibabi rireebeka. Kwonka egi tekabaire engano. Bwanyima ekura eba omushengye. Eki tikikabaire engano. Amagara garimu, kwonka teri ngano. Bwanyima aha muheru gw'omushengye hariho akantu akari nk'akashongoire aku eshisha erikurugamu. Kikiri ekimera ky'engano kwonka tekabaire ngano. Bwanyima ekimera kitaho omweyangye, kandi tureeba ebishushunga nibikura. Ebi nibishushanira kimwe n'engano kwonka tibikabaire mbibo. Bwanyima engano ekurira omu kishushu. Hati yaagaruka kuba oku yaabaire eri omu kubanza. Hati engano eyezire eshaaururwa.

Y

esu Kristo akafa. Yaahayo amagara Ge. Amagara ago gakaba gari ag'okugaruka aha kanisa gakareeta abaana baingi abari Nkawe omu kitiinisa omu kuzooka. Kwonka nk'oku embibo y'engano yaabaire neeteekwa kugira

ekigyekoreire kugira ngu ezaare embibo z'engano ezikanyire, nikwo haabaire nihateekwa kubaho ekanisa eyaabaire neija kwekorera amagara ga Kristo. Nk'oku eibabi, omushengye, n'eshisha hamwe n'ebishushu byabaire byekoreire embibo kwonka byo BITARI mbibo, nikwo n'ekanisa yona omu busingye bwona ebaire omwekorezi w'EMBIBO y'amazima n'obu yo yonka etari mbibo. Niyo nshonga erikutuma twabaasa kugamba ngu Ekitabo ky'Amagara n'ekimera KYONA EKY'ENGANO.

Reka ekyo tukigarukemu ogundi murundi. Hanu hariho egyo mbibo eyaabandize eyaabyairwe. Ekareeta eibabi. Eibabi eryo rikaba ritari mbibo. Ekataho omushengye. Ogwo tiguri egyo mbibo. Haija ebishushu omu engano eraakurire. Ebyo bishushu tiyo mbibo. Eshisha yaareebeka. BWANYIMA OMWEYANGYE GUGWA AHA TURABYO. EKICWEKA KY'EKYO KIMERA KIHINDURWA EKIHURIIRE. EKINTU EKY'OMU MBIBO EGYO EYAABANDIZE EKYARUGIREYO OKURABIRA OMU KIMERA KYONA KIHINDUKA EMBIBO. Ahabw'enki ekimera kyona kitarahindikire embibo? N'ahabw'okuba nikyo kyahangiirwe. Ekicweka ky'ekyo kimera nikibaasa kugaruka kuba embibo ahabw'okuba ekicweka ky'ekyo KIMERA KY'ENGANO N'AMAGARA AGATAHWAHO G'ENGANO.

Oine eky'okureeberaho ky'ekyo ekihikire Abaisraeli nibaruga Misri. Bakarugayo bari nka miriyoni ibiri. BOONA bakahunga nibarabira omu kitambo ky'eshagama; BOONA bakabatizibwa omu Nyanja Erikutukura; BOONA bakaruga omu maizi bashemerereirwe okweyoreka kw'Omwoyo Orikwera n'emigisha; BOONA bakarya eby'okurya bya baamaraika; BOONA bakanywa aha rukiri orwabaire rubakurata. Kwonka nabwo oihireho abantu bakye munonga bakaba batari kindi kureka abekorezi b'abaana abaabaire nibaza kubakurata bakaza omu nsi ya Kanaani. Abaisraeli boona TI Baisraeli. Kandi okwihaho abantu bakye munonga abandi boona amaziina gaabo gakaihwaha omu Kitabo ky'Amagara.

Twine ekintu nikyo kimwe omu kanisa ebiro ebi. Amaziina nigaza kwihwa omu Kitabo ky'Amagara. Tihariho maziina agariihwa omu Kitabo ky'Amagara Agatahwaho ahakuba orwo n'orunyiriri orundi rw'amaziina n'obu ruraabe ruri omu Kitabo ky'Amagara. OKU NIKWO KUHAMYA OKWO, NGU RUHANGA AKATUHA AMAGARA AGATAHWAHO, KANDI AMAGARA AGO GARI OMU MWANA WE. OMUNTU OINE OGWO MWANA NIWE AINE AMAGARA (AGATAHWAHO); OTAINE MWANA TAINE MAGARA (AGATAHWAHO). Kandi abo abaine ago magara bakaba bari Omuriwe ensi etakahangirwe. BAKATOORANIRWA OMURIWE ENSI ETAKAHANGIRWE. Orwo RUZAARO RUKURU RW'OBUKAMA, Yesu Kristo, akabyarwa (akafa) kandi ago magara agaabaire gari Omuriwe gaarugayo nigarabira omu kimera ky'engano kandi hati nigagaruka kwezaara omu mbibo nyingi z'engano eziine amagara agarikushushana, kandi nizishusha nk'Eyaabandize ahabw'okuba ahabw'Omwoyo nazo n'enzaabandize.

Hati nitubaasa kureeba ahabw'enki omugore ocungwirwe (mukama we owaabandize arikumugura naamwegarurira) (akaba ari Omuriwe nk'oku Haawa yaabaire ari omuri Adamu) "amaziina g'abo abari omu mugore" tigarikubaasa kwihwa omu bihandiiko. Omugore n'ekicweka Kye. Omugore ari omu kitebe ky'obukama. Tarikubaasa kucwerwa orubanja. Buri omwe omu mugore n'ekicweka Kye kandi tihaine n'omwe oriburaho. Kwonka ekyo tikiri kitsyo aha bikwatiraine "n'abo boona" abari omu Kitabo ky'Amagara. Ahakuba omuribo harimu abari nka Yuda, n'abandi abari omu kicweka ky'ekyo kitabo kwonka amaziina gaabo gaihwaamu. Nitubaasa kureeba abo abarikwija omu biro by'aha muheru, kandi bwanyima y'okukora emirimo mikuru, Yesu aryagamba ngu tarikubamanya. Tikugira ngu akaba atarikumanya ngu bakaba bariho. Okumanya byona Kwe tikukaikiriza ekyo kubaho; kwonka tibaramanyirwe ira nk'omugore; kandi nabwo tibaramanyirwe ira nk'abari omu bahikiriire ab'omu kuzooka kwa kabiri. Tibaraanire byana byona (ahabw'okuba bakaba bari aheeru y'Ekigambo - tibarakigumire

u) kandi bo, n'ahabw'ekyo, bakacwerwa orubanja rw'okufa. Reero nk'oku tubaire twaboorekire enyima hariho abo abaashagikire omugore bakamuhwera kandi baamuhuumuriza. Abo amaziina gaabo gakaguma omu Kitabo ky'Amagara kandi baryataaha omu magara ag'ebiro n'ebiro. Aha muheru hariho abandi nka Faraho abu amaziina gaabo gatakazaga omu Kitabo Ky'Amagara kandi aba nabo nibanagwa omu nyanja y'omuriro.

N'ahabw'ekyo ejuma y'engano eyaahindikire ekimera ky'okushaaruurwa niyo byafaayo by'ekanisa. Nk'oku ekimera kyona ky'engano kitari mbibo y'engano, kandi nk'oku ekimera kyona kitashaaruurwa, n'ekanisa nikwo eri: - ekanisa yona ti mugore, kandi tikwo yona erikuheebwa amagara agatahwaho, kureka EKICWEKA kyayo nikihunikwa omu kitara, kandi EKICWEKA kyayo nikibiikwa kugira ngu kibaase kutaaha omu magara agatahwaho omu kuzooka kwa kabiri, reero EKICWEKA kyayo ky'ebishushungu nikyokibwa omu nyanja y'omuriro. Kandi eki nikyo Yohaana Omubatizi na Yesu baagambire, ahakuba Yohaana akagira ngu engano niziija kuhunikwa kwonka ebishushungu byokibwe. Yesu akagira ati, "Mubohe enkyenzi, bwanyima mushorooze engano." Egyo nkora erikushagika okwegaita kw'amakanisa neija kubohera hamwe amakanisa g'enkyenzi, ahakuba enkyenzi niziteekwa KUBANZA zaabohwa, kandi n'obu omuheru gwazo guri okwokibwa, tizirikwokibwa obwire obu zaabohwa kureka nizibiikirwa ekiro kya bwanyima, ekiribaho aha muheru gw'okutegeka kwa Kristo kw'emya rukumi, nari aha kuzooka kwa kabiri. Kwonka enkyenzi zaaheza kubohwa okutwarwa nikubaasa kubaho kandi nikubaho omu bwire bw'ahagati y'okubohwa n'okushaaruurwa kwa antikristo. Bwanyima haryaija ekiro obu BOONA baryemerera hamwe nk'oku kirikureebwa omuri Danieli. Omugabe aryaba ariyo ari n'omugore We kandi omu maisho gaabo haryaba hariho omutwe muhango gw'abantu ab'okucwerwa emanja. Eego. BOONA baryabayoye. Ebitabo byona byashuururwa. Entebeekanisa ey'aha muheru gwa BYONA yaakorwa. Okushaaruurwa buzima kuhweire. Ebitabo ebyabaire bishuurwirwe byashwekwa.

Okuhendera eishomo eri obwire obu, reka ngarukye aha kigambo eki naagambire omu kubanza ahu naagizire ngu tihariho Kyahandiikirwe na kimwe ekirikugamba ngu Mukama HATI naahandiika orunyiriri rw'amaziina. Buzima ekyo nikwo kiri. Kwonka hariho Ekyahandiikirwe ekirikworeka okuhandiika okuribaho. Kiri omuri Zaaburi ya 87. Zaaburi egi neegamba ahari Mukama naahandiika amaziina g'abo boona abaazaariirwe omuri Saayuuni. Tihariho murundi na gumwe ahu tushemereire kukitwara ngu Ruhanga naateekwa kutegyereza okuhitsya aha muheru gw'obusingye nari obwo bunaku obu Ariba naakwatanisa na Saayuuni kugira ngu amanye abo boona abaakuba baazaariirwe omuri Saayuuni. Ogundi murundi, ekyo kikahireho okumanya byona kwa Ruhanga. Buzima Naamanya boona abari omuri ogwo mubaro. Kwonka eki niki? T'orunyiriri rusya rw'amaziina oru Ruhanga arikuhandiikamu amaziina masya ago agaatsigaire ahanyima y'okuzooka kwa kabiri kandi gaine akakwate na Saayuuni? Buzima nikwo kiri.

“Eiziina rye Ndyarihamya omu maisho ga Tata na baamaraika Be.”

Okweta amaziina omu iguru! “Omuntu ku afa, agaruka abaho? Ebiro byangye byona ebyantereirweho nkaabigumisiririza, ntegyereza obunaku bwangye bw'okurekurwa. Ku waakuunyeta, nkaakwetaba; kandi naiwe okaayetenga kureeba eki emikono Yaawe yaakozire.” Omuriisa Mukuru naayeta entaama Ze omu iziina. Eiraka rya Ruhanga eririkuhanga niribeeta okuruga omu mucuucu nari okuhindura obutafaari bw'emibiri yaabo n'obu baraabe baabaire batakagwejegyeire. N'okutwarwa. N'obugyenye bukuru bw'Omwana gw'Entaama n'omugore We.

Kwonka okutwarwa tikwo kweta amaziina kwonka. Okwo aha kuzooka kwa kabiri, aha kitebe kihango ky'Obukama Ekirikwera eky'okucweraho emanja, amaziina garyahamibwa omu maisho ga Tataitwe na baamaraika Be. Hati ngambiirwe abo abarikumanya, ngu eiraka eririkukirirayo kimwe oburungi omu matu g'omuntu n'okwetwa kw'eiziina ry'ogwo muntu. Abantu ka nibakunda kuhurira amaziina gaabo nigeetwa omu maisho g'abantu. Ka nibakunda kuhimbisibwa. Kwonka tihariho eiraka ry'omu nsi eryatura eiziina ryawe kurungi nk'oku eiraka rya Ruhanga riryeta eiziina ryawe ku riraabe riri omu Kitabo ky'Amagara haza rikagumamu kugira ngu rishuuruurwe omu maisho ga baamaraika abarikwera. Ka nirija kuba eizooba ry'omutaano obu turihurira Yesu naagira ati, “Taata, bakaatura Eiziina Ryange omu maisho g'abantu omu biro by'orugyendo rwabo rw'omu nsi. Hati Niinyatura amaziina gaabo omu maisho Gaawe na baamaraika boona ab'omu iguru.”

“Oine amatu, ahurire eki Omwoyo arikugambira amakanisa.” Ogundi murundi Omwoyo agambire. Ogundi murundi tugarukire twareeba ebyabaireho ebi Omwoyo yaagambire aha bundi busingye. Kandi tushangire ebyabaireho bihikire. Obundi busingye buhingwireho kandi bukahikiirira buzima nk'oku Yaagambire ngu nibuza kuba. Ekyo ka n'eky'okuhuumuriza ahariitwe abaine amatsiko g'okuba omu mugore w'obwire bw'aha muheru, ahakuba nikituma emitima yaitu yaagurukaguruka ahabw'amashemererwa kumanya ngu n'Omwesigwa kandi ngu Naija kuhikiiriza eki Yaaraganiise kyona. Ku Araabe yaabaire Ari omwesigwa kandi ow'amazima ahari abo ab'omu busingye bwa Saadi, nikimanyisa ngu nikwo Ari n'omu busingye bwaitu obu. Aha bw'embabazi Ze n'amaani Ge ku baraabe nibaija kwakiirwa kandi Akabasiima, nikimanyisa ngu naitwe nikwo batyo. N'ahabw'ekyo ka tugyende, tuhikye aha kuhikiirira kandi tubugane Mukama omu kaabunga, tube Nawe ebiro n'ebiro.



[www.messagehub.info](http://www.messagehub.info)

Obutumwa obu bukabuuirwa  
**William Marrion Branham**  
 “... omu biro by'eiraka ...” Kush 10:7